

湘綺樓全集

湘綺樓箋啟附四

目錄四

長沙湘潭王闔運字壬父著

鄧彌之八啟

陳俊臣六啟

丁稚璜七啟

劉景

韓七啟

湘綺樓箋啟附四終

目錄四終

湘綺樓箋啟卷第四

長沙湘潭王闓運字壬父著

致鄧親家

前聞劉家言信還云營葬已畢無任感愴昨得來簡敬
悉平安果老遺令傳贈均辭六金前約經笛兄親交乃
收十八之數自可不補其兩郎他日尙須謀生或有相
求之日也三弟過省時適往瀏陽闕於款接畱語皞兄
指索裴信今示又需曾緘此似不知朗公爲人者彼宋
學外示無私假以行法若有信往則大致蚩厭闓運竊
料楊司使藉隸豫章久官西蜀先公遺愛必及子孫今

到桂踰時當有青眼想家報已及之矣寄書未知公館
幸於作諭時先達區區續有復札也非女生長箠笞未
化驕性當家操作尤所不諳由遣嫁太早致多尤悔今
幸因疾畱受檠括三年之內禮宜別居夫人向未授室
亦不能理家政除喪之後方當獨任井曰然今日情勢
欲令兩姬贊佐冢婦亦必不能則所謂當大事者徒虛
語耳張公百忍悠謬之談家庭骨肉不宜粉飾婦實不
德孤負舅恩非有改悔之萌難遽收其小效假之歲月
怨去恩深爾日之雍和必有非意計所及者此則私心
熟慮不足爲俗人道者也闔運今歲坐廢居諸几案漸

疏外緣總集陳伯母又於五月十八考終衡山尉署遺
言不還故土不耐夫子卽葬長沙由闔運擇地安葬月
內當可還柩俟葬定再當奉聞比日酷熱初涼忽忽酬
應辛兄處未及別報

得書喜慰前由易生寄一函至武岡想尙未見耳小年
兄弟有見卽書不遑計其婉惻與否但不使高底鞅與
聞耳來答深執謙和得無客氣耶淦郎舍所長而用所
短然出房非可豫斷非女得蒙成貸當欣然矣功兒來
啟云吾兄復有小星之納何其勇毅已從門入耶抑尙
是吾欲云云也闔運客寄於此欲求一似人者而不可

得蜀女多於鯽魚不可爲鰕魚奈何奈何講席非可久
居一日不勝其勞僅可一年畱去思而去之上之上者
也丁公處尙未辭昨司道來問關書隨人云方大人攜
入京矣有其主必有其僕故是一段佳話與笛其賞之
今歲院生高第者二十六人皆爲二景所搜而去頗有
空羣之歎尙有十餘人未施檠括奈思歸甚切又有校
經之志恐不能畱每誦謝康樂詩至感深操不固未嘗
不泣然也先生乃以寓公爲祝何耶仲冬能成行否且
畱度歲或圖一聚無任欽遲之情

得書知復當上省適已具舟又念眾口悠悠宜鎮以靜

不欲老兄輕出且志事已成刪改聽之羣議君家正以
索版爲迂致啟攻端念鄙人奇計未必依行故不復待
也承示新詩十餘首知雍容靜肅無罅可乘老夫一聯
尤爲回春健筆進於道矣由杜而陶所謂漸近自然闔
運至謝阮便竭才盡氣無級可登奈何奈何去冬有詩
五六篇今行勉和二作聊寫呈鑒儻能策所不逮否游
衡詩乃不恤爲羣紀之謙闔運所願學未能者今聊命
豐兒恭和兩篇意欲與中書比勝老兄頗畏後生家子
雍所謂啟寵納侮者阿淦掉頭不肯顧卽此得無跨竈
耶舟中夜間輒當面談明日入峽至蜀都再陳所聞伏

惟珍衛

久未相見望因秋賦送考一晤談及聞賢子言畱居不
來大失所望采九亦爲怏怏後生固無論也大壽禮應
趨祝僅以文代乃又遲遲後期不加責言猥承獎借功
兒所書弟初未檢察俱蒙許可爲幸多矣當遵諭莊書
寄上也思賢行所無事殊愧素餐明歲合肥見邀若兩
家子弟同中已約辛眉同達藉得游談老兄必亦欣然
舟車旅食之資力能供給知兄憂貧聊欲圖報無煩計
畫矣儻不果所願明年亦必謀一會弟頻有災劫占爲
奢侈之咎然意興不可減或亦可厭勝耳時事不及言

大要不必言因便寄書並頌歐嬰百福

彌之老兄親家先生道席前因家書寄上一函昨歸承
使復奉惠念唯有悲仰但慚東門而猶賢西河駿流而
還反更肥澤可以上慰拳注下釋女愁趨庭覲朝時幸
諭知之李黼堂近已失明不闕修史與哭子黎簡堂又
中風亦不闕入峽與出峽高碧眉昨又病故與皞臣懷
庭而三此三人者誼皆深於慶來而閭運以一歲身被
四創非有道術豈能游昇之殼哉弟妻又遭繼母之喪
弟蜀旋三月冒風雪而奔赴然於未去前猶拜客一日
寫信一日其冥頑強項如此比之左季高一拜墊之不

能跪者其度量相越遠甚而黃子壽唯頌師相之精神
令人有就撫館求三舉之意老兄閱此得無哂其自揚
而自抑耶此時夜已五更尙須畱幾句爲保之書中材
料故不多及蜀歸頗有物可將而本部堂行色怱怱竟
未暇檢高底鞋則李申甫之流一事打不開饋歲之儀
未能整暇則弟之材短處也雖然千慮一失智者當鑒
之專此敬頌年喜並問歐嬰福綏

彌之老兄親家先生無恙淦郎來奉手書反復殷拳唯
有悲仰比欲卽答而去使怱怱不相聞適會私允借免
遲慢之咎想荷鑒也非女於廿二日遷殯城外計到家

適百日以了孩幼提挈之恩差補課讀不慈之恨而已
至其不克成立無補於尊門雖至老大亦難自振不足
傷憐也老兄見送詩卽以杜鵑山哭爲詞蓋有前知而
此女頗了死生絕食七日精神不替無涕泣傷別之言
殆亦自明其泡幻者則慈願之哀亦可釋矣葬事前已
屬賢子請示遵行弟家擠蹙未能畱居候試日內弔客
悉至後當清淨再令與陳俊臣嚴受庵諸郎按日會課
以期無負雅望太親母以次哀念冢婦幸以闔運意轉
啟爲感餘不具云

彌之賢兄親家先生道席讀復書承念甚摯唯四十年

至交老而愈謙弟畜之人同於兄事先生之稱何其太多屈生有言不浸近而愈疏吾滋懼矣文理之治宜先僻遠潭人浮動不及夫夷舍王依劉前言戲耳光被金山斯爲盛也孔子言爲之不厭誨之不倦闔運勉學不厭頗成倦誨僻退蜀席如脫金羈焉有再設皋比之理生長通都大邑無山水游釣之娛夢想桂零無人偕隱次子長妾舍我而逝時方愉安未至遽當變名獨往京華隱於人海非有求名謀利之意思賢校經船山皆遜謝矣賢兄及彭朵園均以教學爲詞間之頃痛闔運聲勢已成窮大失居年近六十祇圖自佚不復能爲衣食

謀也談經講藝則所願聞將與翁潘游於廩店必若有
買山之資亦當自歸否卽自了一身以妻託子視羊風
拐角時已大富矣身事一人當了家事豈一人所了耶
穉璜幸已歸眞雪琴亦將稅駕比之曾左俱免潑湯閻
運無可進之階有敗名之懼善刀而藏不亦可乎局刻
遼金宋三史均仿南北史款式宋史半成金史未校南
北遼三史前已送呈矣王氏新經春秋禮記頗爲難得
今先呈儀禮一部又有八代文萃六十本係有用之書
索價十六金嫌其太貴係門生所刻曾送一部與四女
添稍未便再索又不肯價買俟他日減價發兌時再致

送也蜀卽吾家不以丁公爲來去書易得耳恐未必再刻矣秋涼伏維道體勝常賢郎侍佳爲頌

彌之賢兄先生親家道席薄游遄返情如昨日及得來訊方悟久疏垂問殷殷感予萬緒小樓長日涼雨暑雲延望夫夷末由造郗輒述游狀以對嘉懷闔運自過中年有哀無樂庭前兒女慧者先摧頻邁三殤遂成塊獨思欲棄家長客以埽塵緣適會穉公之喪汎江泝沛藉詞赴弔直指麻城尋君難道之篇追我古亭之迹孟冬朔雪枝策岱顛雪日清棱聊成高詠因憶辛亥同上祝融模寫靈奇揮斥鄙薄雖善誘不遺於下里而內慙莫

解於蓬心懷此積齡今而一洗其詩曰伊來聖皇游非
余德敢升自謂振衣千仞歷倒彌辛矣又有回馬嶺松
樹歌亦超於李杜人世悲歡於斯頓盡華泉小住因靜
得明寫成論語注二卷及入京城間訪下斜保安之迹
恍如隔世初欲結廬海淀旋聞習戰昆湖金鐵擺琤弮
歌靡賞同人或欲營宅石刹亦有畱教成均自以魯生
之業孤又懲太北之道廣兼得家報婚葬相催長兒拮
据殆同焦爛顧念逝者宜有蓋帷我若不還彼難歸土
二月初吉乘雪出都訪劉景韓於清河從李少荃於潞
水並久離重會歡諱有加惟汎海三朝殊乖心想以言

浩沔亦不過震盪之觀若論波瀾遠不若江河之壯日出三躍尤爲妄言上海停輪便逢小友偶行街市未覩鶯花作小詩云楚俗餘珠履禽聲效越蠻擺落解華兼容英法亦書生經濟也寒食還家至今怱冗求田問宅勞敝無成而卞莊有白簡之彈鄙夫多患失之慮頗疑閻運失職倡狂同季良之交通學張儀之一怒兼之曾伯自反不仁亦謂北行乃爲瑜使若賢兄當此疑謗殆必不支閻運任命委心虛舟逸棹既不能效靜者之謙吉亦何容置荆棘於吾懷玉池間之深加結納醉投車轉勇撤舉比自念取徑太高與世無偶遂於此月攝館

思賢感兩姻齟齬之讎忘後車馳驅之鑒秋冬家事粗
了乃復出游功兒年已近強名不出巷覆蔭之下驕情
有餘口食尙難自求青雲何階以進但比吾幼時富貴
多矣比來智者皆言時乎有變賢兄深山閉戶理亂不
聞閭運旣居省城又無一畝何暇遠計以詒子孫哉秉
臣乘但之危可以一館嫌月請太薄更再謀之吾輩伏
處衡門何能振其親戚此當自咎不怨人矣附上哀詞
二篇卽同遣訃外二本送一劉尙書若未談及卽不煩
轉致餘俟續啟敬頌道安

致陳親家

去秋得手書以前寄兩函方發未久故未奉復也今春又因唐生奉上一箋計六七月必達昨承慰問具感紉憶承宣久攝公私順熟文公能否卽蒞亦兄舊交贊治同寅必無枘鑿湘中奄奄吏氣見之茶然閭運旅寓城中買山未得經手軍志欲考覈軍興以來其有幾營聞者不以爲難稽則以爲多事所謂報銷清冊者託徐鴻臚覓之亦無回信卽此知辦事之無謂而眾人之皆醉也回思貴州編書時眾力合擎誠一時之盛想仁兄在官時思妙高城南起兵之時亦有今昔之感矣衡州風災而郴桂缺米今夏早熱恐有旱災幸涂生遷去俗氣

稍蠲官民尙相敷衍耳楊石詮罷官歸寓省城方知左
督用人之謬李雨蒼能言不能行不必於他處驗之卽
其隨丁數人精神不屬尙何能當大任然比之左李則
識論高遠如幽谷之於喬木彼左李者所見旣謬則雖
力量愈大忠誠愈篤皆實戒其巨謬況又濟以私意加
以揣摩伯夷所以去之若浼孔子所謂見如探湯者正
爲是人也此等人何能裁抑雨蒼雨蒼乃欲借其權力
以立門戶吾輩當爲之傷惜萬不可隨聲附和以爲左
將用李也凡用人者必勝於所用之人漢文帝不能用
賈生不能窺賈之學也宋人發妄以爲將老其材彼見

文帝爲天子賈爲之臣故也假使賈爲天子文帝必不
謫長沙李雨蒼爲欽臣左季高必不間居而世人尊李
爲天人鄙左爲粗才者又必紛紛矣莊生所云蜩鷲笑
大鵬者誠有見於世人顛倒之見閭運久不欲論世事
因感來言故聊論之知君房又怪子陵矣夷務無可言
凡彼有動靜皆可不問在官盡職餘唯以文史自娛爲
祝

得今年二月二日手書情餘於紙爾時新命已下日來
當移署矣閩中乏材之國藩使求賢之主相需殷而相
遇疏所代爲兄憂者也然激厲陶鑄自有微權金玉作

人詩人所美願一以曾侯初起爲法無效其晚年之脂
韋則昌陽豨苓皆良藥也去冬懷庭書來言蘭谿相逢
譚及遠人洞庭舟中曾賦一篇寄上來書云云似尙未
接到東西萬里我勞如何闔運因感稚公喬木之聲復
爲安邑豬肝之累旣已期月幸未素餐中間一歸長沙
與筠仙樾岑盱衡時事因論朝詔屈指人材將帥之選
眇不可邁所謂塔羅彭楊之軍胡沈王閻之吏求之今
日已成古人其尤可恨者雪厚猶存二丹無恙觀其設
措大異曩時卽仁兄綰印二藩官年俱進而比之妙高
危牆之下小西陀罍之中意氣陵雲霄忠誠貫金石思

箋啟四

追逸軌豈可得哉然則非世無材非材不用時勢使然也況驚下如閭運者焉敢復申眉扼腕論芬韶之睡餘乎雖然樗以不材全渾沌以不鑿生湖海之士豪氣未除比之昔年猶故態也兩兒昏庸平世之生員何可言學長者爲朱學使所賞送入校經堂肄業次兒從至成都六雲攜所生四女侍行弟婦以老病畱籍頗譏嫂夫人不致仕也吾輩遂已推排作老物賢子中有幾人秀出者聞孫石雍容木天頗有憂貧之嗟此子他日定不減李少荃蓋世情濃者功名之士也閭運乃李眉生所云沒出息者故行年五十而不知四十九年之非時復

吟咏以消永日耳簡堂素未深知比來觀其言行胡咏
芝一流人物聰明稍不及然在楊劉之上彼在黔艱苦
菁華未竭也聞校經堂有三士頗奇皆永州永順人湘
其未衰耶久不相見臨書覩縷荔支正熟清福自珍爲
頌

前歲季春命舟東下寔以移鎮齊魯思處錐囊旣尋舊
游兼效一得甫欲解纜忽得西音稚帥以失約相責詞
義正大遂改計先由棧道直指東封中得一訪香濤藉
匡不逮乃爲譌傳所誤云稚公亦卽高遷荏苒經年竟
無去日今則妾女踵至鈞石重溫瞻望海雲遠難會合

此二年中仁兄焦勞跋涉於饑饉師旅之間雖福力俱
宏凶灾化吉然艱貞困苦爲曾胡所未嘗盤錯試利器
無乃太虐耶每晤穉公言及節下輒嗟憐其無輔闡運
對曰某本往山東而公留之又爲此言何其矛盾穉公
笑無以答也膠東冰合旌旆當還厯下冬晴但祝平爲
福不望和爲貴也季文舉措乖方進退失據遠竄海濱
難言塞責雪芹有福竟不潑湯張倪霑光多矣石泉平
穩差勝沅浦厚菴復出將爲蛇足公所力保之鮑超殆
將階亂於蜀使城南時從弟意無人成功亦無人致禍
曹公不赦呂布誠有遠見鴈可養虎不可養又增閱厯

他日當思鄙言耳閩運自今十月朔日以後當天發誓
不復議論縱橫緣昨得長孫言及文史流傳之人多無
後福故欲以陰功補前過甫及二日又當與公通書不
覺隨手又寫出無數妄談此爲劉伶戒酒請卽以此書
爲證後之王閩運則醇謹老成言不輕發矣曾滌丈云
我豈猶若前日之亂糟糟耶放下屠刀閉口不談人長
短兄聞之或亦疑信參半請待相見時驗之專肅叩安
並諸郎均吉

去歲聞開府之重曾因李總兵培榮面致頌祝並達鄙
忱計於臘底達聽昨接三兄道過長沙亦竟未得寓書

唯郵駟日通政聲宏遠風裁益峻軍武始經積弱之邦
且得一二戚鎮以奉指輶則海寇潛銷外侮不作蓋作
官如作文敷衍完卷人人可了若必欲稱題雖師子全
力竭蹶不遑況兩越隱憂方大造福亦遠誠得其人中
國可振故闡運之所以期節下較詠公之期滌帥而尤
遠也丁公日營四海孝達志經八表材或不逮志則有
餘然求賢審官未若公之優於天下益勉訐謨以副眾
望幸甚幸甚俗人猥多尤以嚴威爲貴今人撐架子則
自知其官尊遇公事則自忘其官尊徇芘周旋殆同里
長調劑苦樂如分社肉自平寇以後此風尤熾夙荷同

氣敢以此規節下本起京官母效沅峴唯恐人議其外
行而故作時派耳簡堂雪琴昨俱相見每言公望八坐
罕儔砥柱中流匪異人任閩運畱蜀三年頗崇儒業乃
去冬謀歸終隱先遣次子還湘道卒夔州年僅廿二此
卽來書所稱爲佳者亦實能傳家學遭此橫翦令人失
氣旋於臘初抵里閉戶逃人問舍求田無可託迹衡陽
故人略已喪盡舊鄉囂薄又不可居貴州太遠家人又
不樂往因循尙在城中且俟移家既定乃復往蜀大要
明後年事若有變局亦不能往也湘鄉王步軒名肇鴻
曾見賞於沅浦後以口舌得罪不甘伏處翩然東游閩

箋啟四

運已與書唐藝兄李幼梅爲覓一館儻節署有可位置
尤望隨才使效但無效稚公之於常生驟長其驕耳陶
甄羣材是公所長因思往事輒多覲縷

前得嫂夫人赴音卽擬撰詞躬奠致稽唁慰家事煩冗
倏忽半年匿跡山中日親版築遂忘世事矣昨暫還城
奉手書乃悟慢滯之愆不加督問仍承垂注故知篤舊
知心過於鮑叔感愧感愧閩運虛名招胄灾禍延纏故
人不遺爭相濡煦取其一得待以賓師筠仙雪芹旣虛
講席少荃孝達方欲羈縻竊以垂老背時懶復酬酢奔
馳南北蓋有託而逃非復希冀脂膏窺伺督撫去冬還

轡所願盡償而文卿不諒復爲延譽張何之蓋飛蔭蓬
門干木踰垣誠非得已孔子曰富而可求執鞭吾亦區
區之楮攘臂何爲自入故山百無聞見此五十年未有
之樂也時局因循待盡而已少荃負於權勢多所瞻徇
叔平頗務虛名不樂西學鐵路斷斷議首津通軒然大
波激怒醇耶語盡離宗想皆天外勢不能行不待言矣
小說云兩近視爭楸字楸猶未挂鐵路異同實類於此
承詢利害則有可言鐵路之利民間過舟馬遠矣若山
谷間皆開支路則流通滯貨均平物價可使四海皆若
比鄰大凡治世者先使民老死不相往來後必使民萬

里如在庭戶由塞而通由獨而羣他日乘金輪而行四天下固非翁所能沮亦非李所能贊也若官欲以之取利斯所謂尋晦氣耶至如調兵拯荒豫設不祥以生大役不待問而可答逐之矣詩云黃牛遇戾力難勝言朝廷不能止鐵路也又曰四方各自歸烽煙言四方不能成鐵路也又曰七載終畱一線延言僅存唐山一線路也仙人先告我矣先生豈聞之耶李雨蒼春夢未醒乃踊企於黃牛昨已告之真成一笑也小女輩均乘鐵輪馳驚而來人人贊歎不知裕陳奎倪何見不及此雪芹遺摺省城頗咎陳大人未能核定昔唐藝渠遺摺係閩

運代擬大爲王夔石所訛遺摺猶有美惡一何可笑總之年過六十唯有獨居時畱一二處可打皮口之處發皇耳目誠消遣之一法老兄得之矣閩運又自負也節前妻病極危少間作書恭問起居餘續上不具

俊臣仁兄先生節下自聞開府已再遣書均應人之求藉申己悵想次第入鑒矣越南兒戲遂告邊警曾徐由此其選未知東海藩使亦勞籌備否今日夷務祇宜張皇紙上不可見之施行此又兵法心書所不載者慶南甫兩下策尙爲家夔所驚況勝彼者耶稚公昨有大文以未報故不敢宣他日當得聞也黃恕公請疾散遣家

人有舊僕李貴久服勤役思謀善地將與書節下尙恐其不得收錄也因彌之之妹告於弟妻轉求弟畱紀文達所云長隨之求薦通神者矣節下見之試其可否如可用則彼有鄧王二人之保舉信爲奇材如不可用亦乞看情面與別薦發財之地萬不可使流落及失志而還弟爲穎士招來起見特肅手書

致丁親家

稚璜宮保節下前臨鄱郡辱荷知延荏苒一紀久疏民敬辛未春偶至京師憑黃御史寄上一詩及拙撰桂陽志一部聊申企仰人事荒忽亦未知曾達與否昨者湖

南委員曾令還言明公勞役河壩須髮頽白齊魯水患
垂二十年閭運於己未年佐文星巖撫部曾擬一疏文
未敢上今逢仁牧克澹沈災扞患立功莫此爲大雖在
林野樂聞其成願以措施方略因暇寄示幸甚幸甚衡
陽監生常集梅文節之族子家貧游學偃蹇江淮聞歷
下游談之風有長安笑樂之志昔人所云於水見河於
山見岱於人見韓太尉者明公卽今世之韓太尉也敢
介一函以成三見尙冀加之拂拭試以冗勞如工作有
可安排常生勤愼無習氣未始非手足之烈不然則州
郡小館亦免飢餓於君之土地想明公任才有宜屐履

得所不虛其行矣閩運近居深山唯以箋注六藝爲務
已成書箋詩補箋凡卅九卷差足仰酬獎借耳霜寒道
長無任拳勤

去冬得幙府書兼示厯山觀稼之盛卽欲牽綴蕪淺上
頌成功人事忽忽迄今未就昨得文卿兄畱述雅意垂
詢游處之迹入蜀勝覽自香濤視學時已有前約因憚
獨行又嫌提挈逡巡有待旋聞彼方有主講之議尤難
自赴今聞持節欣願趨依文兄所籌旅費家用其事纖
俗似非雅論但去歲經手編集湘軍戰守事錄今年五
月方始勦彙半歲未必能成要俟此書寫定乃能買舟

溯江上謁轅門耳水南索價韓愈所蚩不足煩經慮也
下車政令如禁迎送除節餽省宴會皆古人之通義今
世之罕聞道咸以來官吏以川廣爲樂土則其民不堪
命可知駱文忠劉霞仙不能大革其俗非識力不足自
處未能無欲也欲之所在利名並重節下一以古意行
之則積俗丕變萬民知賴矣然近日大僚在仕宦途祿
候補人多其人旣入官必有一二大寮爲之主顧而困
乏顛連之狀又易達於院司思所以拯濟之乃爲一歲
一更代之法故挑斥實缺以爲騰挪市惠作威較之貪
侈者其惡萬倍習而不察反得頌聲网上虐下以徇情

箋啟四

面斯誠不可解之故也今欲施治在遵律令實缺到任
繳憑一依舊章則上司不可畏而牧令自重三月之後
不勝任者以白簡從事三月以前加之訓戒而斷不可
引畱省察看之說無故遏抑之調補委之藩司督府察
其當否則事權歸一憲體亦尊此外候補者審其才具
足供差委而已如有委署以輪爲酌分其年勞殿最前
後如輪委第一者不勝任卽委第二以下見爲勝任而
治狀不副亦依實缺例訓誡之撤參之其先見爲不勝
任之第一者果不寬誣則餓死不足惜如一時意見偶
誤則彼固第一仍爲次輪之一是雖輪實酌雖酌實輪

必無非本班而冒借得缺亦無能挾八行餽千金以橫
來干求者吏治何弗澄清人員何至擁擠乎孔子曰如
有所譏其有所試州縣未任事何處可以察看此不過
與朝廷爭用人之權耳至一歲一代雖龔黃不能爲治
而庸人皆必爲惡大吏先存一傳舍之見而後以此爲
恩威節下公忠信於海內其必先革此而後議其他固
可知也區區以此進者親見其害烈於盜賊或恐俗吏
持省例之說以緩新政稍待則難改矣至夫汰勇練兵
蠲煩去苛次第敷行願觀尤眾湘中舊民皆爲抃喜閩
運城居一年應酬頗劇學業無進深負賞音因承寄訊

先行奉復

稚公先生親家節下在巫山兩寄牋問亮塵幕府風波
修阻嬌累煩喧不奉音問忽然旬月冬春政暇侍福多
歡蘭玉纓紳椒蘇觴詠當西南之康樂酬謨畫之殷勞
致足樂也斯可頌也閨運於嘉平三日始還長沙三舟
順流一物無損茲實明公之福芘亦峽游至快之事唯
亡子尙未安窅拙妻又遭母喪困石蔕藜旣歎且笑左
公怱怱請急火速之官其意欲實做畫錦堂開手二句
文字玉公尙未得代龐藩聞尙勤明湘城熙熙尙稱安
帖李黼堂病目殆必失明餘皆照常喫飯而已鹽商新

設義學欲以閩運爲館師自行束脩未嘗無誨擬亦諾之校經一席便請前學使陶子珍編修蓋凡主講者必有餘於位然後可從容肆應閩運以布衣而抗公卿明公遷代代者必勉強姑畱去住兩難此所以不可久也張香濤雅人猶欲以紅人自命忘勢與忘人之勢公與閩運皆一時不可得之人才以此開蜀中教澤他日必有其效矣護船哨弁張書蕃奉差勤謹堅不受酬微末弁丁當如何給獎尙求畱意附呈土物數種皆廿年前尊俎舊味亦故民獻瓜之敬尙無哂其不腆耳新年崇喜恭敬鈞安

正月四日始得遣來弁齋書還謝越兩旬奉到去臘七日手教拳拳引進誠款芬菲具仰曠懷優於天下雖施非其人或疑假借太過然賢於隗者自遠然轅如此求治黎民職利而同城寮吏或猶扞格此則俗敝已久古義淪亡邑犬吠怪迷者難悟要之斯人必非異類遲遲自化蜀當丕變也近日兩司承風恐後求如滋軒稍不唯阿者同時僅見月叟恢張亦自明了三人同心此則上理明公化火阨爲福地天之報善助順確有明徵唯宜乘此機勢痛與刪除取彼俗庸束之高閣出二山於外鎮斥延寶之中援吏氣一清不待白簡興利理財又

其末矣新甯又煩咨度昭通事自難掩此公澣然無欲而舍己循人君子之過重於貪暴太谷遼濶又不足論鄱州節度頻致譏彈臺省囂然爭於鉗射張雖外用轉似終南家作奏章以希自見人材益少物論滋多樞機不能不執咎也湘中兜鍪餘氣笨伯如初劉曾告歸城中頗有二督峴首雍容卽當見錄沅弟鞅鞅未知所由昨乃怪怨閩運以所作湘軍志爲詆訶功烈金剛之徒附和一詞怒於市而色於室已爲可歎而鄱州人士怙於名位竟成積習身與交游莫能救之以此知史公論淮陰未能學道誠實見其所以然而閩運德望俱無坐

觀擾攘亦實無挽回之力湘人愚直之風遂已衰矣初在城日少尙未料其至此此一隅之隱憂耳比來僅與諸學子講論經義冀以漸導毀其所作辭其美館以示無我之心然先達乃後進之觀瞻紅頂猶然沉於白面此非院司主持不可明公以蜀中教益歸美鄙生母乃本末倒置乎亡子本宜卽葬因厝地浮土有螳其母兄堅欲別卜田莊丙舍難求因循半載閭運行愁坐歎一事無成命也奈何俟時而已長兒率三兒已入書院小兒當與發蒙詒子一經不如贏金之便易多矣古之人老而患得蓋有由也簡堂元夕入城借居東茅巷宅

每飯尙能兩盃神氣殊不清醒黃恕翁一見左侯遂仆
於客坐四日乃興幸在己家否則殆矣風淫之疾近日
尤甚亦與時局相應宰相信能變理也女公子出閣何
日榮行跋涉長途妻子等極爲惦念添妝土物當徑致
江淮先此問訊並賀嘉禮族子代綬去年司書局頗有
侵牟在途又多攬盜特命夔局恐負心誤事爲闔運羞
俟五六月可諭撤之緣其人外似樸誠而臨去時下手
甚毒能使不及防則無所施技便告局員傳飭之云闔
運求撤令其速還則不唯無弊而反收其小效知人不
易微物蠹猷鉤鉅之法眞不可少況夫委任百僚總持

萬里當人心陷溺之日有巨萬財賦之搜辣手苦心相
需爲用求賢自輔明日達聰廣壁兼賅竊有至望西雲
長蔭延想爲勞初春晴和小樓明淨手書申意不覺覩
連慮妨察思猶多未達

穉公先生親家節下奉別以來惟深懸企夔州上啟未
盡離懷緣心緒煩訥郵程逾邁計當還箋賀壽已復逡
巡伏想福綬定符齋靜晝長政理文史自娛佚老頤心
莫樂於此時艱事變來則應之若預慮憂危非徒無益
故孔子遭衰世而耳順從心耳順則無悲怒從心則無
怫鬱忠憤之說少年客氣耳屈原曰廣心定志余何畏

懼誠審於致身之道而不與時俗爭也今世人材大略
可見唐崧之佐尙未易逢張鹿所行猶懷二意城中大
僚近唯游叟可倚亦未必卽是通才此外紛紛意趣相
遠公欲俱獎王室彼則志在官財面從後言閭運聞之
屢矣思布腹心豈可望哉治蜀十年宏綱已振後亦不
能自改寮屬奉行而已非獨治兵理財不可更張卽紅
人黑人亦不可移易故下車時猶當求賢今則但可用
材耳後有來者可則與之不可則拒之斯所以當臥治
也惟逸於任人漸求自代斯乃節下逍遙之方竊料斯
時無出公右者則又不必言也錫侯至湘廉能大著卞

公側席待之亦不如在蜀之樂闕運於四月三日到家
妾柩亦承福愍平安出險前託黃母置一田莊以衰病
不能代辦今尙無山可歸日日求覓悔生此累致此攀
纏復居城中徒爲物役幸妻子女孫尙無啾唧然日行
功課廢矣糧儲夏獻雲在湘頗能粉飾亦被劾去遂覺
滿目俗塵庾子山詩云橫石三兩片長松四五株對君
俗人眼眞興理當無故國不可復居深山又防盜掠決
計北上以避喧囂湘中吏習本勝蜀中自王撫以來口
益懈弛近則遠不及蜀益以知明公整飭之功孳孳講
求終當丕變惜監司少能喻者然承流宣德亦不似各

省荆榛也蜀士則積敝稍深且懷觀望客游難久故無
大效僅比往日聞見稍廓耳今年進士五人皆迂謹平
穩之姿稍免浮薄庶不詒教者之辱闕運還家以幼子
失學已久暫爲督課他日或當攜以出游小女寄養德
門多費親太太金心妻婦等均深感戴明歲當來迎還
盼女想時來請安亦求教誨瞻望西峽不盡馳依

稚公先生親家節下四月八日得手書三函勤勤廿餘
紙發函愧荷欣仰神明之勝又竊惜公好勞而不自節
與當世闊人大異既讀論時事諸語則知公目營四海
所志宏遠其量百世卽夙夜勤政猶不過陶公習勞之

箋啟四

意而私心所屏營者猶淺之乎測君子也拙筆好古而不能顯豁視公所作洋纒詳盡者正如蹄涔之與江海遠承委及慚懼莫名聊次所懷以候決擇不今不古大可嗤也胡詠之往言湖外三枝筆闔運以爲皆有漏洞如公奏議精力彌滿微嫌過長然與今日諸公論事則不嫌其諄複但此事非紙墨可罄或宜發其端而仍俟直對耳儻果陛見闔運卽當由湘入都以聽訐謨湘省見報較捷尙可先至也然今日豈能有此快事耶蜀俗久漸佻薄其風壞於州縣而實由於監司本人未有習氣而其左右幕友盤固交結以請託長子孫支蔓數十

年無幕不官無官不與之爲緣以不學嗜利之人讀吏胥條例之書顛倒黑白深入膏肓公之所以小治者非人心頓轉也力不勝也恃力以求勝此五伯偏駁之業如諸葛子產及身而已然公所行實度越尋常人非木石久當悟悔教澤垂裕計在四五十年後比時若官士有賢豪者乃可望其丕變否亦不過一二智者咨嗟仰之耳闔運承流宣化未敢自輕亦嘗奉達德意期於遠大所言所行竊欲開其心胸無如習染已深規模粗定人各有短不可驟化數十人中竟無宏毅之才徒有訓故詞章之士尙難望其必達漸摩之效動期十年生爲

湘人終當歸老卽復再畱三數年亦何所益故欲爲節
下引其端不能竟其緒也來教諄諄一似期月而可者
豈鄙陋所敢問乎且懷遠仕蜀危行高談頗不便於當
道以公寬仁乃有直繩之客羊質虎皮終當遭射幸無
官守亦不必以保全累明公也鄂生又當往滇不知畱
幾許時公意欲以畱後期之亦似未宜此公彊力而多
偏聽實做剛愎自用四字無欲則剛剛愎二字後世不
可多得曾滌公論季高所謂未能當一面者材地所限
不能強也他日自錚錚於名臣傳中然欲闡運推之則
猶未足以同時比之結實勝左而聰明尙不及李蓋一

官一事則有餘用人推賢則不足也就其所最推服者必不以爲勝任滿志之選則其自用可知矣所謂大臣者無他技而有人技論人以無技最難也滋軒時下高手識見又不及鄂生之廣朝廷用之代公則可特薦亦似未宜丹公應詔再出或其機會涂撫遂已作督何劉竟不得遷豹岑舊亦有名觀其張大安南恐亦涉於輕易閩運嘗言以當世爲無人材此處士嫉時之詞耳身居大位卽不得自出考語言無人者豈非人耶有一人卽可用千萬人而何患乎乏材此雖以責樞臣而公等兼圻大府亦有黜陟一新之效願節下畱意幸甚幸甚

要之用人不宜過獎使闔運廿年前得公許與如此則
已高興上天矣恰如題分乃見激揚妙用豈易言哉女
公子嘉禮吉期聞擇在端午前後所寓行館昨遺探邢
上尙未有定日內當已合好新婿當至蜀謁觀否親家
太太還期早晚四世兄入都後節府清閒惟時珍衛
穉公先生親家道席夏間再上啟事旋於唐生處奉四
月抄所齋手教及素紬一疋知兩信時尙未到此後科
場期近官士并心於秋試僕僕槐陰迄未有暇故亦久
疏執訊想監臨出闈又將主試勞於肆應逸在清心秋
爽氣涼肝氣不至復發眩疾早已除根矣幸甚幸甚小

女昨得女公子揚州書聞親家母攜率八郎由齊至晉以待請覲之旨豈武闡奏請代者先疏待命耶抑賦鷹揚而後北上也高麗事少愈於日本臺灣之舉少荃定多詭道然國之隱憂其兆此矣鹽引岸地徒成一笑而內外所爭反在加票自牧慶藩狐兔微物乃能使彈章蠶起筠季偃俚政體至斯變異大矣季子殆將去位乎孝達心苦鈎稽知賑捐之多侵盜猶且憚於一發未識遂可陰消否湘人初起本儒臣壯猶其後負戈荷戈皆躋文位忘其非據自謂功高貪鄙昏庸不可復療比年頻致物論四督失官授人口實寵反爲辱然恐朝議遂

以爲義師之起亦意在驅保舉以取貨財因今日之左曾以訾前日之胡曾尤可傷也簡帥承公知賞未老而終良幹弗成想深悼惜卞撫新起朝望未優又其疏底取於倉卒所述文章尤沓殊乏精神賜恤宣付實爲恩渥唯巡撫例無諡法新議又禁乞恩溢然蓋棺曾不得與文質夫曾樞垣比盛乃至并郭松林黃潤昌之不如聞運私心以爲闕典伏思簡堂勇介實有過人前者視學珂鄉蒙犯瘴癘始開弦誦以漸銷兵及任藩司首攻貴定省城無警軍勢乃舒此則卅年中滇黔將帥功未有過之者也左遷蜀臬贊佐明公始公下車之時扇廉

風以爲之。敝司道驚怪不信世間有不愛錢之官反肆
猜疑誣及左右謂一人矯情僕妾婪私及簡堂之至條
教號令一遵約示真革門包杜絕賂遺然後蜀中吏士
恍然大悟廉貪黑白至此始分此剝復否泰之交功尤
大於定亂者矣清積獄省羈候嚴究誣告京控衰止册
設保甲盜發輒聞孳孳求治無幾微怨望之意近歲左
降官往往託疾不上唯簡堂欣然如新得大官此其純
樸忠良能見其大亦宜特予表揚以風薄俗非明公無
此公心亦無此大力輒附上行述及原奏稟以備采擇
有望於附片一陳之焉漕司例得予諡黔撫亦有諡例

可否徵引文彬曾璧光以感動天心易名之寵庶非幸
致耳湘中今歲多疾家中尙無啾唧唯五月中鄧氏大
女病天年運乖張益慚祚薄鄉里卜宅亦又無成俟公
入都仍當由湘至燕以圖良晤如仍畱在鎮冬杪水靜
或扁舟溯峽但不再居講席以去來自由也

致劉巡撫

辛巳歲唐鄂兄還送來庫平銀二百兩云係子壽代交
比以庫平有餘詢其來手云係台端原封何其廉而不
儉也比時惇惇還湘故未作復癸未夏已命舟東汎將
至天津計良晤在即不意登舟日得蜀信云穉公病危

改途視之遂又羈畱去冬擇期北上忽喪長妾遺孤四
五人當送還家北行又不果蓋會合有前定非獨利名
不可強求也然蹤迹時聞眞除其喜繼申筠而藩撫必
不因翠毛而停頓此則善頌善禱當亦欣然也正月得
手書筆意老蒼迥非卅年前時花美女之派又復三歎
詠佳人半老之句卽根觸滄桑之感來示四君子皆強
弩之末闔運更倦於津梁吾輩登臺者唯有孝達甫艾
此外則皆後輩矣謝公展折於小兒尙何功業之可言
乎旅蜀前後九年一無所成束脩萬金反增累三千金
以年計之每歲用千餘金不爲奢也然豈可長居此乎

箋啟四

將俟妾葬後單車至京師學劉融齋破羽毛外袿一件
一年可餘五十金十年則五百金看人升沈亦一樂矣
家中則必不可居人皆以我爲闊人我亦自以爲闊人
盤盤蓋天破船攬載終身無休歇時此曾滌公所謂道
大莫能容之效也拙著八代詩選早已刻成刻手極劣
不足寄贈尙須重刻去歲刻成三經甚佳俟由長沙寄
呈郎君長成時讀之詩文本不可刊凡人生存唯可刻
朱卷白摺則不帖本若刻文詩人人要一冊人人白要
此惟易笏山李次青張子衡之流有平餘票鹽資本乃
能供之閭運豈其人耶子大先生純乎賢者惜初知之

不盡朝廷用之太晚又微嫌過於謙慎不能知小人之
情狀楊石泉伯仲非某所及以此觀之賢人多有悃悃
難知仁弟儻亦有蘊而待發者耶六年之別語不可詮
次藉頌同福不具

景韓仁兄先生台席吳中暫寓值兩峰參差未能仰禱
盛治方深歉仄隆誼殷拳感知惜別然閒雲樂飛不樂
畱也比想佳婦宜家長暉迎節賀至之奏有感新綸高
子喬遷湘人驤首爲頌爲望閨運於朔日出江次夜狂
風坐客樓眺望頗增逸興計程月半到家再當函謝前
寄新詩三首覽畢乞飭送文小坡以代書問鎮江米價

尚平常州人材向盡近察吳俗大有變夷之勢挽回極難殆非樂土更十年後湘化爲洋則大局不堪想矣救之當以訓吏爲急亦老生常談也專此奉達敬頌道安不具

昨專呈一函計已達鑒榕城夏蔭榴酒天香新政覃敷民吏康樂幸甚幸甚閩運還山營住粗已迄工無福隱居仍當暫出擬於日內北游河陝藉登嵩華以補行蹤因樾岑內召閩中僻瘠台旌指日開府大邦故無意東游也長沙丁秩臣先生及其弟遜卿果臣當道光時儒業尤高湘人歎敬一時名公皆加優禮簞瓢自樂聞望

彌崇子孫丁口稍繁遂有求官覓食者其子重安通判
從葆芝岑入閩至今將廿年閩吏疲瘵公今已悉州縣
強可餬口少能贍家通判間官尤爲無味友人勸令還
里今歲已送母還而累重債纏卒難擺脫知公愛屋謹
代陳請乞察其才能與一優委不能望弭歌三徑但得
空手還鄉庶幾里人知儒門之不墜耳若審可驅策畱
助指擄此在大府之貪賢非閩運所敢擬也合肥久無
來信高麗頗費調停賜堂新除增一同志閩其治矣專
此奉懇敬頌台福不具

別後比上兩牋人事恩促遂復半歲然周星未滿榮陟

三階固久次之亟超亦簡材之難緩閩疆暫寄指願入
騶湘上福星定如願矣頌甚幸甚卜子褊腹而畱心吏
事尙非時流所及閩官清苦無甚習氣其地士大夫亦
皆持正可備諮詢到彼必如意勝吳中也舊僕陳順曾
隨葆芝岑鹿滋軒在彼頗諳風俗今令投叩祇候指搗
又文采翩翩之挑水夫去歲卽思執鞭閩運途中乏人
攜還鄉里勞而且窘思所酬之特令依託鈴下稍資霑
漑其人尙可供家常使喚官中雖無需此而倉猝殊不
易得他日官成政美求田問舍方知其有用也閩運今
年正月卽移硯山莊閏月來城嫁女爲司道公請閱卷

避之不得聊作周旋幸非講席紛繁之比每月不過一二日可了而虛領厚糈仍不安身自食其力不如食人之力同一調劑無須託故羈縻年來爲此奔忙固非俗人所能喻耳附上湘潭志書一部呈鑒此亦千金之作中多舛漏以捐款不繼草草成之外一部求轉寄裴樾岑光祿並希代致拳拳聞其虧空焦勞勸其不必認真以非官話故不作書諺曰打渾水捉魚今正捉魚之時也如欲獨清當極言船局之不必設以節糜費區區小擲節豈不可笑乎樾公忠誠人不能以此說進因託老兄微諷之並以示知夷務者餘俟續上

箋啟四

景兄先生節下前年憑某縣丞寄上詩扇因循兩秋致無一字緣日有相訪之意轉成疏隔也蘇僕還奉手書并詩選名筆尋玩再四復如面對昨聞周嘯軒道臺言政化未孚水旱災皆不恤以爲必無之理又恐籌餉太急容務催科欲親至鈴轅庶可獻替已定於冬至後北發旋因三兒婚期在臘未可脫然臘後嚴寒憚於車馬以此中止瞻望惘然仁兄細密仁祥疆臣無比河南積敝難與弛張滋軒稍加整理已復得謗方今之世最利庸昏然或盡示優容又將何以施治時逾三載威惠必彰但勿隨俗喜西甘心末策一擲百兆國不乏財潰退

千營兵非不足富強之本不在能軍吏治果脩人才自
出區區閱歷所得願備疇咨閭運踰伏五年浮雲萬變
兒女之累幸不相關今歲小旱山田豐熟便得飽飯無
事時入城中院司以次均脩舊好度歲以後翩然復去
亦閒居之至樂也三兒廢材忽能把筆此獎成之力也
今年附入縣學又真不能爲從九未入流矣聞之當亦
軒渠

連得手函均從芝生轉寄時來往衡湘未遑久駐又時
局大變皇恐不安浸浸向雲驚魂未已想膺荷重寄躬
輒尤深新命海疆朝旨有在不以肥瘠爲意而尤難措

施矣疆臣觀望風旨者如張陳胡廖未免輕率而譚劉
王陶安靜太過又成廢弛節下撫豫樸穩過人饒有疾
風勁草之節此同人所共佩服亦弟私心所慶喜者但
緜裏針鋒劉蔭公用而不效如今時事陳文恭所謂不
肖州縣非嚴罰重刑不能革心而藩司爲之樞紐仰公
寬厚致有蒙蔽一二佞諛交構其間吾輩暮年多慈少
威容有不照之處舊學商量願爲公進一解耳周嘯軒
芝台從子庸妄細人已早死矣因其言荒政欲公聞之
非能月旦人也泣任想在春和僚吏歡迎定勝大梁有
趙縣丞璜武陵世家久託悵幪其才志無待遙述惟需

次末秩難於特達欲求轅下一差使得公拂試可冀出
幽遷喬其人與闔運未面而其諸兄皆有交情俱不免
困蹟以此仰干惟加意提攜爲感闔運今年本擬游梁
因有寄諭以大臣見待未敢入網幸不爲四章京之續
然竊附翁吳管束之例還山度歲並不敢入城過年樹
大招風自問非比羊質虎皮亦有懼焉安居讀書庶幾
無悔七十行至爲公作序卽當來拜壽能移近兩湖移
香濤兩江則可游矣除夕懷人手此叩安卽賀大喜
景韓老兄侍郎道席兩年初未通書然無日不念頗聞
福體康健而心志鬱悶時局固爲可憂已退亦何能補

箋啟四

昨送俞仲隅撫部還山序文發明封疆大臣無止足高蹈之義有舍之則藏之時藏則與野叟等耳四郊之壘非士之辱不辱則仍榮矣願爲老兄進一解也負累雖重日食當尙有資如至甌塵金魚宜暫游湘中一二故人雖甚貧吝敝廬薄田供十人之食猶有甘旨揚州危囂不可居也何苦以貧而效富耶弟爲多女所累勉力已嫁其八止有一女今出訪求但得出門便無累矣精神彌滿尙可逐隊入場道過武昌世兄適還省觀留書敬問起居並問閭內外均安吉幸甚幸甚

湘綺樓箋啟卷第四終

湘綺樓箋啟附五

目錄五

長沙湘潭王闓運字壬父著

彭雪琴一啟 馮星槎一啟 徐季和一啟 邵實
夫一啟 陳芸敏一啟 陳伯雙一啟 蔣壽山一
啟 龔省吾一啟 周保三一啟 陳伯商一啟
黃仲弢一啟 郭子恬一啟 羅笏臣三啟 張埜
秋二啟 張正陽三啟 熊樹臣一啟 恆鎮如二
啟 蕭子厚一啟 宋鉞卿一啟 莫摺卿一啟
崇扶山一啟 劉虛谷一啟 芮少海一啟 李蘊
荃一啟 李佩蘭一啟 唐澤波一啟 董小樓一

啟 黃子壽二啟 丁芥帆二啟 許靜涵一啟

楊蓬海二啟 謝培榮一啟 黃澤臣一啟 彭鴻

川一啟 孫道臺一啟 唐稚雲一啟 方葆卿一

啟 羅蓮渠一啟 鄭九州一啟 齊敬公一啟

李次青二啟 李潤之一啟 丁伊農一啟 龍芝

山一啟 尊經兩監院二啟 伍松生一啟 錢閣

學一啟 穆芸閣一啟 曠鳳岡一啟 許仲笏一

啟 王正孺二啟 張子衡一啟 錦芝生二啟

陳笠唐一啟

湘綺樓箋啟附五終

目錄五終

湘綺樓箋啟卷第五

長沙湘潭王闓運字壬父著

致彭尙書

雪琴仁兄宮保尙書節下今歲中秋看諸女拜月因話
甲寅歲節下從衡陽養病還軍相訪長沙徒步東城精
銳傳什如天仙姮娥曾幾何時忽俱衰老西川南海碧
漢青霄卽欲遣信通詞俄承手札殷勤問慰悲壯纏綿
頭白天涯兩心猶照不減元白神交也防海之勤經畫
之略其可見者已具讀大疏矣公當洋面首衝而敵船
不敢窺伺此非宿望偉烈不能幸致孝達依倚遂成砥

箋啟五

柱幼樵不辰身名俱敗然見敵始走亦何勇也前有裕
程後云僧勝交綏未接聞礮已逃今乃憑仗威聲居然
敗績以後白面書生皆敢與紅衣對壘中外之機轉移
在此少相因倚亦得成和事異金人遇隆少保憤懣之
氣可以少紓至於春霆再奮糜餉億兆則闔運屢爭不
得似屬無名然前者賴其跳踉今始酬之重價楚弓楚
得或有數存孤拔既歿左侯旋逝此回弈局又已斂枰
嶺外瘴蒸殊非樂土還湘甚近當荷俞褒矣稚公兩遭
子喪求去頗切歸無所往往亦無聊闔運勸其入都就
醫以希間散昔年馳驅英妙之士皆各類唐繼起無賢

可嗟怪也船山精舍遂獨剏成後學承風必儲俊乂闔
運久居石室謬荷虛推但慕元空猶疲酬對故山無宅
作客看人二者皆非所安亦將草玄京輦未達之業猶
有萬端德功固難立言尤不易易唯觀當代戡亂之材
絕少黼黻之彥實多豈天啟升平先生儒雅將宏聖道
以格遠人乎經術若明開山之功庶無媿於諸君子茫
茫大造未可邇事測也髯霜齒落未老先秋重煩眷念
輒述所志蜀中近得子大單車到官清節更厲于督藩
侈風或可漸革湘省官士喧闐滌公餘風已絕首善之
鄉今益吮襍由菁華盡竭故也何日得幅巾蹇驢仍續

湘蒸之游席設香腰鍋燒龍井剩吾兩老重話少年則
今日之相思復如夢幻霜清氣爽伏願因時禔福不具
致馮章京

星槎仁兄大人閣下別後輒喜得朋還誇鄉里時危道
降通介爲難辛未友張孝達知其必顯然恨其務名不
實果自陷於紅人仁兄才識恢恢當知得志乘時爲人
生應有之境反不如因阨者之足自間則視世事皆得
其端委而所以處之亦無客氣矣古今來驟貴人甚多
如孝達者自喜其飛騰而吾獨惜其孤陋使稍去熱中
豈不一偉人乎聽言當在未闕時故先以此進他日留

意知其拳拳也閩運歸求田舍仍無營住處心甚灰懶
故絕不與友朋通問及今將百日念太疏闊擇尤急者
先寄一訊容入鄉消夏時可一清逋負也壽山健在可
喜今歲得免福祿無量矣然鄙心終憂之鄉省平安雨
暘時若足慰遠念敬頌台安不宣

致徐侍郎

季和先生仁兄閣下京華託契意氣彌敦家累促還襟
情仍結但响濡雖樂未若相忘回首卿雲朗然長照塵
中日短遂及十旬猶闕還書亦自怪也閩運窮大失居
受塵未得仍歸陋巷稍發陳書神做心粗年頽志退聊

期遣日敢曰溫經伏想清閒必多充擴政本在於經術
憂時不可空談事貴通觀道無凝滯此則仁兄所以超
然也屬書遼紙在途已滿中多未檢幸勿示人湘上清
和蕙荷芬馥遙懷高尚未共清齋不勝企遲專頌台安
不具

致邵給事

寶夫先生仁兄閣下京華承教密過成都屢荷嘉招愧
無瓊報蘭池清夏槐省吟冰幸多素心彌增清興家事
牽促尙待數年後始能入都若不厭承明時當相從耳
闔運於二月抵家日夕煩冗頻逢驛使久闕塵箋湘水

瀏其徒思別路近者遠勞恩辭舉玉敝邦鄂岳驛騷唯
恐慢客易曰困於赤紱詩云不挹酒漿臺中或只欲釐
姦而未遑計二星之勞敝耳續有佳興再得奉書專布
謝忱敬頌台安

致陳御史

芸敏世叔老夫子台席幸承枝蔭得賦華琚緣在寄餐
未謀尊酒覆叨醴設深愧束脩東風吹輪南轅返旆江
湖契闊星斗瞻依伏想勝常以爲慶祝闔運徒歌彈鋏
未覓立錫始欲誅茅方須刈稻暫居城市仍理課程近
督學僅鈔輯爾正頗增新意以釋蟲魚命寄拙箋俟交

便驛先此奉謝敬頌侍安梅雨晝長蘭風言遠時須嘉
誨以誘咫聞遙企清塵不勝馳系

致陳編脩

伯雙仁兄同年先生閣下京華小住藉訪苔岑猶恨恩
恩未展情話本欲移家寄止西泠適逢肄武廢我文心
靈臺僦居當俟他日玉窗櫻桃有如西蜀遙思邸福隨
唱歡愉庭祀芝蘭軒窗圖史脩清大隱樂冠同儕闔運
晚遘屯愆頗傷真性近始招收餘魄重理篇章讀易探
爻稍有所見而精神不足向若而驚自笑眠蠶不成仙
蟲視鉤深探蹟之堅果何止十二弗如耶湘夏清涼且

宜戢影延望高致無任馳思手肅申情卽頌安喜

致蔣御史

壽山先生同年臺下出京曾附二片奉問起居兼申謝
意塗中迅駛歸客恩忙到家三月心緒冗襍訖未得早
通消息愧荷愧荷煌煌大文遲遲闊缺藉茲養望因可
傳名想待六月方能出守矣尊體未及前彊應酬似可
節省瞻望卿雲不勝馳系舍親處已發書往問尙無回
報省城近日一毫通借也無株守甚困弟趕急卜宅營
葬亡妾仍卽北上緣晚年不靜萬事關心家鄉朋友寥
寥不如京師樂也叔鴻在家亦未數見筠仙論卜撫以

挈張自牧爲大過此則古今未聞之是非更甚於恭維
申王矣專此敬頌台安不具令孫當更好學深思矣附
問

致龔宗主

省吾仁兄先生閣下春明快聚每樂光儀雨雪載塗未
陪郢唱江湖益遠風月相思靜妙常多文宗共仰以爲
傾企閩運於二月到家心緒索莫小兒女又須課讀日
夕恩恩久疏謝函當荷照亮恩使忽出湘吏震驚但查
辦例須含胡替人亦難如意鄙意以省事爲美如有才
彥乃可更張孔子舉直錯枉今或舉枉錯枉則古今言

吏治者多未之思耳湘省兩少穀價尙平憂時之士多
言防潦游勇縱恣則士大夫不得辭咎鄙意欲自請保
甲而搢紳先生無可推者資年卑賤不敢出頭而斤斤
孫卞豈不愧邪長日清齋默焉懷德專頌侍安並問邱
福不具

致周主事

保三仁兄大人閣下廿年重晤雅誼彌敦恨隔形疑未
能時過瀕行時到門辭謝又嫌促樾疇餞筵未便入談
想能照亮也長沙梅濕正京邸延爽之時遙想高情定
多愉快與循三月杪始到家外舅促令入都去住爲難

可勝太息帖括之學一第爲榮旣得入官又須磨折壯
年銷耗白髮心灰正途之誤人甚矣第覓宅未諧還城
株守仍爲章句以遣朝昏秋後稍閒當至縣校刻新志
戊子公車或有印本奉覽耳專肅申謝敬頌夏安惟照
不具

與陳編脩

伯商世講姻仁兄侍者才名藉甚謗亦隨之及見乃知
通人固不諧流俗也時論固自可畏胡文忠少多不檢
及後才德遠勝曾文正但坐前不講學士不歸心以此
門生故吏無可觀者左文襄少跡弛矜張後入軍機至

爲王耕虞所輕盛名遂敗李中堂無疵可指雖百疏詆
爲漢姦卒不能搖之此皆已事之明驗不問其中有無
也少取清官當以謙和接物冀成德器文人名派草野
無賴者所爲尤當謹於對客耳尊公詩序尙未及作緣
還家仍一事未辦心頗懊惱妻子不能相助此生遂無
休歇奈何奈何梅生已至番禺蘭兄困於盤費未便助
之況也永歎而已清暇念時相聞幸甚幸甚

致黃編脩

仲弢仁兄侍者酒樓話別歸客留思春雪送行還詩寄
意想重黎已代達區區矣道路驚馳未遑投簡仲春抵

里家事仍叢比及十旬猶如昨日想木天晝永土地花
明良友勝游日增材德當今經濟果達爲難能養真知
實深企仰子培令弟於天津相見洵爲僞上芾卿周官
之學尙未窺其涯略他日若成必付鈔刊謙雖美德於
講學有妨晤時均求先致再當奉啟也閩運還家又補
寫周易三卷稍有訓故鄉人士近欲並治尙書亦尙未
暇應之蜀士歲有遠來者未說而樂何其幸耶老伯福
祿彌增以爲頌慰驛便促發致未肅牋先頌侍安餘俟
續上

致郭主事

子恬仁兄大人閣下京華重見情款有加春海平流清
塵忽隔想趨公敏愼退食雍容時有勝游彌增企引長
沙自有保甲之議子容兩珊均駸駸追蹤文正旋聞蔣
疏發難二使將臨倉卒偃旗深爲可笑未知都中果有
風聞邪抑賊人心虛也州縣但患不興作不患小騷擾
因噎廢食如二張何北鄉劫盜實多然非官弁所能禁
止賴一二鄉紳張其聲勢使人人皆如黃蘭丞俞鶴皋
是增一官耳非用紳也二張雖亦官氣尙冒與百姓說
話今已矣乎閩運買地未成仍居城內日有酬酢歲無
俸脩秋後仍當出游耳

致羅總兵

笏臣仁兄總戎麾下夷陵上下屢望旌旗歸櫂稽留始
通刺謁辱承顧訪兼荷珍貽西企柳營正逢蘭茝清和
整暇欽遲何如弟去臘還家恩恩改歲新春人事總集
徒益塵煩湘上平安差可告慰耳水勇曹秉林因其行
囊尙在宜昌不願留湘供役特求一函薦投麾下其餘
自稱弟本家親戚來擾清聽者雖持有川中印文皆係
假冒務求飭而去之則感激多多矣專此申謝敬頌台
安並賀春祺不具

笏臣仁兄軍門麾下久睽旌旆每軫懷思王生來奉到

惠書乃聞令子捐塵曷勝驚悼英年美德方冀太成遽爾蘭摧自關家運但冢婦殉烈名達天閭湘漢頌歌增榮善教所謂不幸之幸又非僅無傷曠懷也閩運於二月出都閉門過夏俟秋冬家事粗了再議遠游筆墨久疏未足贊揚貞媼輒寄二律聊慰慈憂同人若有和章再當寄上先此奉復敬頌助安惟希雅照不具

笏臣老兄軍門麾下前閱邸抄欣聞恩遂孝思榮分二族歸宗衣錦列戟光閭因遣使遲致稽奉賀秋霜應節肅鎮清江遙望鈴轅曷勝欽企閩運成都小住倏又半年丁帥既無遷移諸生猶多攀止比聞嫗屬定於八月

上峽此時當過夷陵夙荷關垂知勞派護今遣哨弁奉
謝卽留待來船隨同標下紅船至萬縣登陸如或碎公
新有調動務乞飭令來弁告知敝姥便於宜昌暫住以
免往返之勞是所切禱專此奉懇敬頌助安不宣

致張學臺

楚秋仁兄侍郎節下去歲京湘沸議波及輶車賢兄苦
口之詞路人揣摩之論時移事異不必言矣翰林求賢
起自曾潘叔平慕之遂成怪僻由無真識而好似龍者
也張謇文廷式無故成名南海小夫敢闖台鼎徒以危
言激論聳動當時煙視媚行取容權貴觀其措意不離

招搖撞騙之爲特科得此輩何如取一二村學究猶爲
膽小志狹且中國學堂無萬數書院乃其大者徒改其
名何益於事而孝達子玖欣然條程彼皆親見通人飫
聞緒論隨風而靡豈非勢利之中人深與凡立身學道
不必託於君父教士課吏節使之所得專而今日一奏
明日一旨此其不能實事可知也因我弱而望人助界
兩大而謀所事其爲人役也必矣根本之不端國是之
未定而欲傾嗣同之熱血贊祖詒之奇謀至今紛紜是
非不決豈非洪秀全之所謂妖者乎今之論者輒謂天
下無才李少泉如此剛子良亦如此鹿滋軒如此譚文

卿亦如此此非謂無才正謂唯我獨有才也推之則堊
秋亦必自以爲人材而闔運更無論矣如此是人人皆
才彼俞廙仙德靜山者特恂謹不敢放言其實亦自以
爲才而謂人無才也求如翁之服康正不可得翁亦人
傑矣哉而適以自殃其身是故求賢用才之說亦不可
不慎也間嘗論之求賢用材截然兩事求賢者自知不
足而將以爲師則必舍己而聽之如齊桓之於管仲子
皮之於孫僑堯之於舜又其大者也此後世之所必無
卽叔平亦必不冒今人可不必言矣唯言用材又必已
才而後可用人近者峴莊出關孝達問軍中有人材無

余曰無也孝達曰君何厚誣數萬人余曰君冑伺候劉
峴莊乎必不如峴莊而後甘爲峴莊所統峴莊非材是
以知之然則用才亦未易言也安分守己而已此則去
年之議論真一夢也夢醒回思可以悟道道在自治安
分守己而已閩運運氣最高去年電旨來詢時正聞四
京卿入獄遂得陰消然恐懼實甚以時勢不可不懼也
今又經年魂稍定矣乃始發摠所見以咨執事人使難
逢適有舍親陳巡檢來請書于舍親丁藩台丁旣故人
之子當勸以嚴絕請託不可更干之陳卽池州之孫曾
滌丈女壻從子翰林名輩之後兼以忠節又係同鄉節

下所宜拂拭者也然學台無廣夏二間仍當託人則請
爲我告丁曰如此如此是必行矣以其家世破格補一
缺不難此胡詠公張孝達能行之事但恐駭人酌委優
差爲託其人無佐雜習氣如丁未到任或節下自用爲
巡捕亦可或託文兄噓植之彼之親同鄉也太相縣隔
故未託之近惟與文卿時有書往還江湖兩督幾乎誤
國絕不通書矣閩運四子各得一孫晚景頗佳一梧不
安靜省城風氣爲之鼓盪已一年不入城鄉居甚樂也
衡州聊以避世亦歲一來十月衡而兩月鄉學業雖未
荒而久停日課託云佚老相去至近不能度領差滿時

或可相見再暢所言

春明度歲密邇清居屢荷招要慚無酬報出都以後日
企飛黃大考猶遲四川未補蓋待朱明之長晝乃同紫
久之連升摻券獲之開坊必矣湘中出使閣下背包幸
有徐龍分其疑謗此輩不知自責但恨人言然打草驚
蛇積薪熏鼠正不必引嫌卸咎耳閫運刻期旋里襆被
看山事不從心尙無著落今謀三多橋一宅託賢長兄
圖之亦尙未有端涯也閏夏暑蒸夜鐙揮汗郵人促發
聊寄謝箋其所欲言俟之暇日文林益茂邸第增綏頌
甚頌甚

與張生登壽

昨過縣奉訪蹤迹知當至衡還家得專使欣承嘉命謹
卽祇承合庚卽問名也回庚則納吉矣下定爲納徵報
日爲請期今者三族無虞霜降應節如可及歲敢請通
詞周禮至今皆姻家主日弟不諳天官并乞代請吉諏
示知遵行或省或衡以衡爲消納徵親迎禮不稽旬至
縣納徵造舟連湘迎女遄臻滿月回門當於年內冬晴
爲善過年卽令壻留女家亦不憊恩矣明歲當治科舉
志於四方桃芙之時南中例雨斟酌早晚吾子職也敢
俟申命以具禮文敬頌冬祺不一

昭潭一席夙所願從諸賢合謀允非汙好惟吳公兼席
大有所贏二百石祿匪曰易致今驟奪之將何所賴且
已纂船山一之爲甚逼人太甚天必厭之吳雖固辭我
不可覬矧皆吾黨其可豫聞幸寄語楊周亟寢斯議如
曰朱孫之意則前旣舉之今不可廢必若吳因遠出大
去無還以我承乏亦胡不可此片可與同人共閱諒俱
以爲然毋曰館穀區區猶甚於乾餱失德且進退以禮
不比舉棋聘書若來以此辭覆吳王寶難軒輊幸再謀
之徐李爲幸

吾賢不中是大福也從此可以反本復古與沈山人齊

名爲湘綺樓吐氣主意雖多不可再生計較矣鄉居本爲種田起見三次手書均唯恐無銀曾不言田今與公約以後切不可言錢錢者無用之貨太公以救荒金銀者外夷所用商賈以便輕齎正爲農事之大害農舍耒耜土舍詩書乃汲汲於生財是不知本也起屋點工但覓飯喫何須用錢方桂仍令監工大事則聽指揮用錢則賣方桂人主喜用近侍而嚴憚大臣今亦此意也吾弟但課農讀書勿與土木爲緣可矣前借卅金卽由楊家撥還外存七十金預備退佃以安頓弟家然但退佃不借本使知銀錢之艱難少說大話少打主意以期實

用卽救時之良藥生財之大道也令徒俱羈縻在院俾夫亦率徒同住完夫亦必來功兒則太失望矣

致熊邛州

樹臣先生同年仁兄閣下有約同舟恩恩未待想賢能高擣大府惜才未遂暫還故不探候蜀都新政整肅上治可期共振頽風毋遽言止足也香濤以言事輒用簡堂乃以末疾遄歸彼此相補猶嗟弱一月卿涖任當覽裕如藩使頗復拔得奇士否北省近稍振作南省亦復改觀豈荆梁均當興運耶闔運於季冬三日始抵家園旋值寒雨涉旬便逼歲暮胸中所蘊積當行之事一不

錢居五
得攄且俟明春方有定局再當奉報耳推命何時寄示
幸告出處之宜時因郵便兼示蜀中事爲望專肅恭謝
敬頌台安祇賀年祺不具

致恆世兄

鎮如世仁弟閣下三歲歡游交情倍摯頻承惠待愧乏
報投臨別餞筵殷勤周至雖多燒一鴨未足爲累也春
首時和行糜蕋事從容待闕按部趨班幸甚幸甚臘初
還里歲暮懷人萬事勞心一籌莫展且須卧雪然後買
山舍間餘倦平安差慰勤注湘藩新政公敏有勝前人
錦水新聞幸以暇示賢兄得意堂上壽康至爲企頌專

肅申謝敬問春祺

鎮如仁弟世大人閣下去歲奉手書欣聞三子登科循
良燕翼歡忭無量卽作賀箋而來使未及取書旋值兄
處有長妾之喪料理歸裝僻館告哀紛紛半載遂闕報
章復承示以金錦賜作添裝亦未答謝至交夙諒必不
責其荒疏也至前用百金係奉還舊款縱令不提施報
亦不宜齒及區區他日官有餘貲必蒙分潤斤斤計較
反生分矣今又思得一策卽作爲賢從輩賀儀則百金
而得四百金之用可以報銷矣兄於四月初一日安抵
長沙過夏後便葬妾田莊單身北上擬於圓明園買屋

三間以作棲隱家事盡付妻子不再問也四女畱在成
都舅姑均加愛重十一女亦畱養督署三年後再當入
蜀一了此緣茲遣丁探蕭子厚欠帳還否特令詣館請
安

致蕭知縣

子厚仁兄閣下舟中得賜詩比卽作復當知鄙意矣大
才槃槃出言率易施之小人則太狎施之君子則不莊
人銜次骨居之坦蕩雖亦足見雅度而被中傷多矣弟
人微言輕諫不見聽方自媿悚何敢妄談因辱煩招謹
以爲報文心兄已有止足之志厯任膏腴僅餘萬金善

刀而藏近乎知恥湘中吏治漸整財物漸充較之前年
似有起色閩運於嘉平三日旋里歲暮興悲雅欲自休
復牽物役無善可頌安命而已使還忽促附申深忱
致宋知縣

錢卿仁兄侍者蜀游三載過從頻煩忝附相知未能薦
達直以青萍見重舉而不先囊處有時不宜私請故也
瀕行顯白歲內當已被選矣治譜家傳定符所望玆叟
久病殆將不起治公居止相接朝夕扶持昨並得晤言
老人神光猶旺來畱並幃子已面交矣樾公新署辰沅
城官遂無相識校經一席已定陶子珍編脩閩運明歲

有思賢之館一年一千蜀謠成識生女更喜當亦不虛
事皆前定信也臘初至家次日卽還敝縣會妻母之葬
還船阻風泊於鵝崖乘暇作蜀書百紙其有遺漏非因
軒輊若逢相問爲我謝之專謝錢筵敏頌春福不宣
致莫總兵

搢卿仁兄軍門節下臨行奉上一啟諒入典籤冬孟告
行復蒙派船護致緣途安穩實賴鴻施爲費已多曷勝
慙荷西邊功奏蕃部綏和卽賜彤弓顯酬丹節專閭之
寄豈俟稱揚惟聞銅政更新方資鎮攝勤勞之外未許
優閒耳閩運冬首解維臘初登岸湘城靜謐親友平安

左帥暫還曾彭得告鄉人尙稱興旺明歲郭筠丈推主
思賢講席暫不能至蜀中良晤猶遙幸時通問來并張
書蕃差事勤慎仰希給與優差以酬勞苦專此申謝敬
頌春祺不具

致崇成綿

扶山方伯閣下三年奉德不陋芻蕘雙節敷榮共尊棠
棣有略分言情之雅忘朱門蓬戶之分臨別瞻依賁儀
稠疊百朋錫我知育才重土之心五兩歸帆詠星北雲
多之句大藩方授小草先春引企輝儀重當旅見閩運
儒賓久忝四荷嘉招教學徒勤一無成績蜀道雖易於

平地家山難答夫移文昨獲允辭幸蒙庇順嘉平三日
抵長沙因使附書先陳深悃東風入律續有嗣音敬頌
年祺無任感企

致劉師耶

虛谷仁兄先生道席蜀都快聚獨闕延尊冬杪驪歌乃
承賜餞反賓爲主荷德增慚春信俄催燕閒多福遙瞻
清塵彌憬欽懷閭運順江放船途中順利嘉平三日幸
抵家門人事恩忙妻孥悲感固不及去年光景然鄉園
多趣故舊經存比之客處思哀又亦較勝湘中冬煖似
蜀昨始稍得北風左相假歸五日卽赴上元晝錦之榮

有如洪經略會館行香之迅疾熒煌炫轉石火電光閤
運歸來稍遲已不及面聊書新事以助雅談

致芮師耶

少海先生仁兄道席武擔看鏡屢過名園肴搗合鱗頻
陪盛會仍叨特餞祇益中慙江上春回庭前福滿從容
兩府非少陵束縛之情頤養千齡無靖節婁空之歎羣
推清暇益頌康娛闔運五十知非三年倦客還山有約
虛期望於五男載酒雖來感秀苗之一瞬兼逢歲晚倍
有塵勞遙企停雲深懷臥雪專此肅謝敬頌台安卽賀
年祺不具

致李知府

蒞孚仁兄先生閣下金城游宴數接清塵帳飲殷勤兼
蒙深眷傳言未訶告別多慚歲序俄遷春寒稍重想起
居調協公望增新當倚才賢以熙庶績投閒之歎無悶
高情也湘省冬煊近始祈雪得雨鄉人興盛氣象彌昌
闔運於臘初還家便值親友多故疲於酬應歲暮諸事
難做隨眾奔忙無可告慰者亡子亦尚未葬尤增煩擾
俟改年部署稍定再當詳布先此奉謝敬頌台安並賀
年祺

致李江安

佩蘭仁兄大人閣下旅泊棠隄因天晚未得脩謁乃蒙
親停車蓋辱訪行舟岸險江昏徒勞瞻企復承惠致佳
筍旅食餘甘紉感隆情長途增眷山川遼闊時序推遷
倏值春回伏維多福想時和而政洽寫輿訟於琴聲引
企超崇以爲欣願弟提攜弱小經涉江沅冬孟挂帆臘
初解橐三舟平順俱荷福星明歲當暫息塵勞料量家
事令兄處時得通問再布所懷專此肅謝敬頌年喜

致唐帽頂

澤坡仁兄軍門節下三年款聚厚愛先隆攜取如家求
施不厭別時旣承早餞又拜多珍瓊玖投難但歌永好

耳新春受福四境同康節度從容仍開高會坐少一客
時復相思閩運順水還湘將春入室家庭紛尤酬接疲
勞亡子葬尙無期講舍已將起館命中少暇世上多緣
遙羨清塵堪推整暇西雲可望良訊時傳專肅申謝敬
頌雙安並賀年喜

致董川北

小樓先生兵備節下久奉清塵時深景慕仁違良誨益
切眷思午節後辱畀瑤章重勞曲顧山川緬邈適甫卸
夫征颿節序推移彌遠懷於鈴閣兼聞嘉禮喜溢趨庭
尤爲頌羨閩運獨抱韋編仍尋素簡愧徒增其歲月幸

遙聽夫頌聲仰望芳儀俯慙蒲質

致黃親家

子壽仁兄親家先生侍者前奉八月中惠書敬承安福
湘蜀公私政事彼此自聞雖隔江山未爲離別比知筠
公往滬樾岑巡鼎力臣入祠賢郎高等又聞煙館滋蔓
擔夫爭道斗才解餉成翁席地可喜可愕何謂寂寥此
間學業益隆後生可畏吾湘聖諭昌明之日卽蜀中青
出藍謝之時光遠自他未敢讓也簡堂英銳逾昔忠純
可敬輔以良友何愧胡曾西不畱賢東爲此匯惜矣閭
運重至閉戶潛修打鼓堂餐乘輿宴會以爲日課而已

宗翰公兩院趨公雙符在手屬員數十薪水二千顏色
敷腴其樂何極唯來書以爲奉準畱川則非事實新寄
部費更煩一奏猶恐補繳銀兩則終身無官本家觀察
何其善頌乎許曉黃麓各攜二萬金以歸閩運他日亦
可挾十之一湘中自此多蜀財不令周封翁專美也大
夫偉略已去經邦九老高吟猶遲咏韻在外忽冗實爲
可憾明年決還山居以惜分陰專此恭敬太親母太夫
人福安並問雙禧

子壽仁兄親家侍席初冬見湘報賢子中式弟姪解首
欣然而笑喜兩家之同喜也一當貢而不貢一不當革

而奏革曹彭能持其權陳謝遂吐其氣此則爲吾兩人
之所能爲矣功兒向不能文今年闡作居然成章又弟
所私喜也堂上解顏諸孫雀忭斯乃兄之全福敬賀敬
賀湘中多事揚州恐難安於位松不若龔龔不若崧以
此知蜀之多材也李相廿四條張督廿四款遙遙相對
皆法後餘波藏英通商富强基此昨請打密奏欲令不
從中制懼未可得耳裁四撫撤兩駐藏皆煌煌大文胡
詠丈所謂把持者恭逢其盛不暇自畱地步吾湘中恢
詭之才除張力臣外遂不多見生不逢時又爲慨然總
之湖南有招山愛出百步大王閭運今擺落樊籠雲游

四海好喜也好喜也十年前舊交唯樾岑書問不絕申
夫之恨湘軍志較沅伯尤甚閩運復書云他日閩王殿
下亦惟有俯伏認罪自投油鍋不知可平日之氣否廿
年前舊交則無間然閩運從此不與他人鬥氣此吾石門鄉中
廖惠連之語當亦愛我者之所樂聞也冬春當入都再當有
報冬菜今年旱潦傷敗俟明歲方有佳者奉寄並以復
命專頌侍福雙喜不具

致丁成綿

芥帆仁兄同年先生侍者錦城重見進德之猛突過胡
潤之乃知大賢慧人不虛受波折以前日之才識加今

茲之魄力清流求人物必當首推矣玉階足疾復發將居揚州從方子箴游龐三初政公明湘中大有起色左相欣然上任不知有何施設弟與之相去一日竟未見面諸人見者又無由窺測高深大要平庸守職耳對眾自言爲家夔所擠頗懷恐懼餘則頤指氣使自命弟一濶人而已閩運於十二月初三日抵家途中安穩三船物無霑潤但江柑夔柚十不畱一養望之貓瀕行時走去所欲畱贈花盆久待遣使搬去竟不見來已爲諸生封作官物在船上得手書乃知小疾信一草一木之有主也貓其爲辭雲階乎閩運明歲主講鹽學係商人作

主與蜀中官運相反宜爲恩童所許亡子尙須覓地此其母意故至今尙未歸土三年出游少者長幼者少誠有如張香濤封事所言者又當築室移居殊爲累贅嫂夫人尙在鄂渚邪一水盈盈兩邊費用恐非建昌永甯所能對付如有善策幸時相示蜀中遼遠湘信尙捷以後有可報者弟輒飛達不必報書也

芥帆仁兄同年先生節下昨別恩恩辱承郊送謂當還城敘款旋以牽挽速行驚進長征便成萬里回瞻鈴下若隔聲塵春去難畱夏長多憶清吟悵望當亦相思家鶴未來宗蓮大去八萬之數計亦贏矣天上玉堂一時

難企暫還鄂息或亦當時然事會多遷公才已裕特超
倫等亦非虛頌此則明者自定之但時扎報爲幸錫侯
涖湘如太阿出匣卞莊之勇猶議避之湘吏自夔汴以
來習於頑頓才智識力迴出其下故上下頌聲翕然以
此知蜀政之美繼自今者未必能及王英承伊初出茅
廬亦如尊經新生未經陶鑄人才已竭君相尤難則不
獨湘蜀然矣閩運於四月初到家因田莊未定暫難遠
出請託干謁紛至沓來適成一無聊之局卞生深居慙
出消沮閉藏主人如此歸家將何所恃故北行不可已
也傳漸生復有湘糧之望所謂慶封又富知吾輩當又

窮矣。齏裝尙可一歲。否寶之嗇之。秋初再得相聞。先此奉謝。

致許師耶

靜涵仁兄先生道席射棚文席頻奉清塵盛饒嘉筵渥承雅惠歸舟還望企引爲勞東風報春西樓置酒談燕之暇時一相思幸甚幸甚。閨運提挈妾女經歷離湖遙託吉星安旋。敝邑湘城冬煖今尙著縣卒歲無衣可無漂烈米價亦不甚賤。唯有大竊盜援一丈竹竿便可踰牆席捲之餘飽食油炒飯而去。惜不得油炸城隍一治之耳。歲首無事聊書所聞以供塵揮。

致楊道臺

蓬海仁弟先生道席五月得四月手書欣若面對雲
來時親詣弟夫人辭行並感疾吐茵而還來書謬言未
別者欲爲內助而反掩閨仁恐亦條律不能相恕也滇
事得賢者調和必有協恭之美聞銅廠商人但欲不禁
私銷似亦可行方今無所謂例闢冗者畏事以例爲藏
身之固以破例爲自便之圖鶴公當非其人蔭帥亦無
此意何不憇愚試行之凡贊佐人者以聲名狼藉爲不
避嫌怨之實據季二等卽由此起弟欲持節則其時矣
湖北候補如麻李小兄已下逐客之令豈可再往乎郭

松已枯王鼎方盛天下事誠不可料比聞俄人將以游兵嚇左軍而走之英吉利爲地山請命而黃竟體以爲不可冬初必有怪局樞府無人良足嗟也采九吾之雙文久當明保因其佩服朗山致此遲滯侯沈公持節采鳳不復隨鴉矣闔運危坐冷氈形同熱客幸課督有效明歲可歸湘中並二館以待吾裴公據督銷而作主將來苜蓿盤中不患無鹽弟如欲作校經堂生亦當奉調也賢從不待屬託惟無情無理之照應非老監司不能爲之殊非闔運所能置喙不使饑餓則或可矣簡撫甚稱臬職此近年所僅有而絕無者以知湘潭人物不錯

文格氣死何其小哉與循乃請本班則前日摺卷竟爲
何事今年吉士惟一王正孺耳六月着綿小感寒疾聊
書所思惟安穩照察不具

蓬海仁弟先生侍席賢從來奉賜詞扇卽欲繼和嫁女
醫妾旦夕不遑黑官冷人時來相攬除在轎中無一刻
自在居然一李仲雲爲之啞然今乃心生一計進京投
供云可選兵馬副揮伺候松筠舊友不亦說乎不亦樂
乎翰仙幾得首道以在制臺前說官話超次用首府護
理羣道歸咎焉子大清節棟動列城生平未見稊書不
知有西廂紅樓闔運敬之愛之不覺內慙可謂訥訥老

儒百僚之式也藏英通商軒然大波丁公本欲引去因
此興高采烈笏山有護院之望亦不言去矣然有事總
在明秋暫時難過嫵口仍畱成都李笏山舊例也紹曾
指日高升遇此波折遂亦停頓官運年將信有時乎今
年尙未把筆作一字無可寄者也不罵人也不奉承人
亦無可告者左文襄李文芋李文眉相繼登仙意欲討
挽聯索性一副也不做叫化子討飯莫同路討挽聯者
亦然賢弟所見有佳者否恐欲尋張叔大之作不可得
矣以死在議和以後也因便遣舟還家乘曉作一函奉
問雙安不具

謝祝令

培棠仁兄刺史閣下辱奉惠書深承款曲政成期月頌
溢雙江雖無脂潤之功喜有絃歌之效甘霖盡溥惠澤
彌深幸甚幸甚闔運於去冬旋里三月還舟碌碌仍前
無堪告語城中自黎公到任官氣稍各屏除能績旣彰
當膺卓薦預以告賀

謝黃夔州

澤臣先生侍講閣下前奉復書敬承虛佇文政兼美毗
俗太和微惜遠麾末由仰挹彈指歲暮勞企如何巫山
祠謬以意推果蒙鑒可謹以作銘系後待寄裁甄緣復

箋啟五

有還湘之意將期面呈今竟不果東下又承許大令致
聲索稿不揣荒拙輒令弟子鈔本呈候鑒定仍乞飭發
丞長俾勒壁間亦雅化之一端也

謝彭兵備

江州機權勞車馬之光臨泉奉分廉助菜鮓於客設祇
承厚意矧益離懷回望福星眷言湘路敬諭鴻川先生
雄藩節度壽履頤和律轉春風聽飲音於樂職政成吉
月迎魏闕之新恩卽慶熊轅遠占鶯語闔運扁舟出峽
初臘還家米賤債稀屋寒人少幸新歸之旦慰謀卒歲
而仍嗟因使附書敬謝大惠祇頌春祺

謝孫道令

簾垂舊肆頻來駟蓋之榮帳設華筵仍費一金之直重
施無報告別增慚敬諗仁兄慶集琴尊春回珂轡尋梅
杜宅憶西湖橋雪之游調管京房占北極井星之瑞俱
逢新喜遙頌佳安闔運一葉還家六花霏路江湖歲晚
眇然舟楫之前風霧山深曾此棲吟之地客游雖倦嘉
會可懷專肅申謝敬頌台安

謝唐徐

堆雲次鶴仁兄同年閣下華陽設燕方共歡游錦水歸思忽
催驅曲猥承盛饒再展隆情出峽瞻星迎春頌福新年

多喜公府甄材竚望首推以符心願闔運三年作客一
舸還家經涉江湖蹉跎時序嘉平三日甫卸征帆人事
紛紜尙無擺置亡子葬地猶待訪求思賢聘書已將敦
迫有緣懊惱無命清閒所幸故里安和新藩公敏初春
殘臘猶似承平李黼兄目疾已深僅與左侯一見筠老
新移別宅意城亦建連夢李替郭興此爲新事船還附
啟不及詳情專申謝忱敬敬春福

謝方師耶

葆卿仁兄先生道席別時歡宴以思歸竟不暢飲過巴
詢知賢子已還當復開懷命觴矣所寄一箱家丁三人

其舉猶不能勝城中又新有大盜一夜竊七口箱唯用
一竹竿縱登二丈牆先生之爲累不小候取還時再當
馳報耳然酒錢不比潤筆可葉子煙了之也弟歸家不
見其妻詢知丁母憂而去家中匠役紛集爲我起樓徘徊
無所往步至郭侍郎處開口便問明年仍去否答言
不去便云好極弟聞而喫驚豈招權納賄已有欽案派
恩童耶久之乃是欲延主思賢一席昔之先生指腹定
外孫之館今之先生館不落地書此相報爲閣筆窮吐
氣也人事恩忙言多意襍容後續聞專此申謝敬頌雙
祺不盡

謝羅知縣

蓮渠仁兄閣下西游錦水承光愛於賓鴻南泊銅官懷
好音於乾鵲膽雲道遠計日春來黃綬之官朱弦協治
早傳新政以慰遐思闔運教學無成言歸守拙辱承張
飲未報李投出峽平安還家允迫湘城臘鼓感時序之
遷流花市春棚憶燕間之歡會輒因還使手布謝忱敬
頌春祺諸維朗察不具

謝鄭知縣

九州名士早傳置驛之風駟馬官橋仍值登車之日欣
承來應許共游談訪舊情多懷新意愜敬維小軒仁兄

先生槃才重展治譜恢張羣公驚注籍之年百政盡輕
車之路益州錦樣雖新翻奇巧之花公府銀平咸倚判
紛披之筆卽酬勤勤以慰裴回闔運冬孟告歸清尊獲
餞依江泛舸近臘看梅家園當饋歲之辰驛使送宜春
之帖謹憑西使敬佈謝忱祇頌年祺不具

謝齊知府

敬翁先生同年仁兄閣下蜀游三歲居止接連齒錄無
遺心交有契時承款曲每荷經存告別東還懷仁西美
春洲俄綠府第延鴻侍膳蘭馨趨庭綵襲佩服榮出應
節春和幸甚幸甚闔運於嘉平三日始至長沙家累紛

箋啟五

三

紆年光迅速初無頭緒但有形勞回憶少城之游益羨
壽觴之樂謹因還使恭叩春祺不備

致李藩臺

次青仁兄先生侍者去歲別後卽聞梓里有歉乏之虞
尋至用兵今春譎言尤甚靜鎮安撫遂已屹然所謂不
動聲色措於磐石豈弟卞公蒙福而已佩甚佩甚二唐
齏粉棍法如神此後事已歸官不扶自直便可高臥天
岳不入省城切要之言想智者能招其所以然也闔運
家居一載問舍無成近乃汎舟東游將之秦晉有舊攜
蜀兵一人不能同往失伍經歲再補無聊藉隸珂鄉近

在轂下指撝揮霍當在不遺此人有曹交之容兼能伺
候送茶傳帖不至失儀他日東山再起亦可備君家敏
達執刀之選專遣走叩敬頌練安

去臘過夷陵卽聞太夫人違和及侍養至孝之狀今正
有蜀軍至長沙係珂鄉里民傳道慈躬大愈方深欣忭
比自武岡還驚承遺訃頃讀啟狀悲仰曷勝孝事有終
雖復節順然以人間難得之福驟失之於一旦其爲深
痛蓋較之鮮民百倍此又臨牋於邑自傷於終古者也
焉敢爲先生慰譬耶懿德難銘謹撰挽詞一聯不足以
示綽者閭運家中喪病相繼今年不復出游亦半死之

桐矣手肅奉慰巨孝不具

謝李和合

潤芝仁兄總戎麾下蜀都游客久誦賢聲湘水詩人夙
同家學三年款曲九賜便蕃臨別餞筵又承旌送思仁
江永頌福春來遙羨安和以慰欽企闔運臘初還里人
事恩忙到家一宿便至鄉下經鳴婆隴感往年戰事兼
想同功偶作四詩附呈清鑒並摭謝意敬頌雙喜

唁丁通判

伊農嫺仁兄太守旅次十一月杪從宮保處聞太夫人
之喪曷勝驚怛高壽全終雖無遺恨遙念仁兄承歡侍

養孝敬彌深獨奉還輶倍悲源本所冀勉崇禮節以副
斯覘闔運遠隔江關莫陳絮酒謹撰誄語一聯庶慰哀
慕宮保起居康健時得相見並以附聞

致龍學士

芝生仁弟同年台坐別筵佳饌在路猶香小雪送行清
寒悵望玉堂天上成連海中倏忽分張感何言矣歸期
刻日幸及劉生寄聯得到於門牆來訊乃先於還客喜
無大考免衣鉢之虛驚續有新聞疑彈章之實上清官
成要閣學其來幸甚頌甚闔運空往空返不俗不僧稍
減牢愁仍尋故業近又寫成周易三卷略有發明方督

姪兒新注爾雅十二經皆有家本足與大監抗衡但苦
煩囂未能精究耳閏夏清永敬頌同安餘值布不宣
前申奠敬尙闕弔書山川悠勞驛奔況悴比聞考貞成
事讀禮閑居幸抑賢哀以臻慈孝大兄奄逝傳重當門
俱賴支維願加勤健也閩運於交游中連喪三良殊嗟
獨活蜀游已久黔技將窮初冬決歸將移鄉僻蓋飽諳
世味不能不倦耳匯東早去滋軒未來來赴宜由湘更
寄並以奉復長夏梁陰冀勉自攝無任區區

與兩監院

夔翁仁兄先生講席比年共事渥荷優容取別惓惓未

謀杯酒知我者必憐其冗迫也向臘人歸鱸堂事簡從容靜攝福壽彌康丹翁送考甫竣束脩隆腆年饒臘肉當倍去冬尤羨尤羨閩運提攜弱小穩泛江流一月有餘征帆始卸至家之日延聘已來人少館多何其可笑校經堂已定請陶學使閩運便居鹽局一席官中又別有經課一館尙待高明院事得兩公主持必無荒惰亡子葬地未定約俟明春其殯宮紅梅與海棠並開當得冥福知荷垂注附告瑣瑣專肅申謝敬頌春喜

夢亭丹庭仁兄先生道席兩承賜問具仰深眷道遠未面悵快如何成都人來備言院事斟酌無做可期永久惟退

黜陳岳進用張生舉枉錯直民不服矣兩君親見其事
莫能爭正豈別有微意欲使闔運聞風自退閉門思過
耶否則黑白顛倒督學不任過他日必反咎兩君矣張
生以遠大自期其平日議趣固不屑屑於張孝達吳仲
宣但不宜有顯遇使院生效尤降爲附課使其自退固
不礙其爲偉人作窮官也今乃假書局以自進無辭愧
之本心頑鈍至此深負所望闔運雖不復蜀游而與學
使冰炭之心沒齒不忘願以此書示之張生使光評其
曲直再集百士論其是非必若闔運所言之謬朱公所
言之是則貴州可舉國而攻我豈張生一人之私忿哉

若言有可采事非無因則張生終身不宜復言書院及
考優貢之事此外富貴功名學問經濟及與閩運交情
一切如故而朱公之陷於不知亦抑兩君之未能切諫
必居小過正議直繩當播天下此近歲一大事不可不
爭者也齋長附和亦爲可怪士氣如此使人灰心尙何
學之可講哉儒生迂直謹白所疑將俟回示乃後與朱
切論也

致伍編脩

松翁仁兄先生道席杏壇密邇侍坐三春桂樹淹留思
歸萬里朔風催別時雨懷人延跂音儀有如饑渴春回

歲始道遠江深惟頌福崇以隆道訓高堂歡養有樂間
居旨酒思柔其尊鄉老琴尊之暇金玉無遐閭運出峽
平安還家悽惻殘冬景短閉戶廬深憶良會於前年羨
滿門之多福筠仙主講鄉塾強作替人明歲伊唔又更
新士蠶絲未盡敢辭煮絡之勞繭紙纔鋪莫寫纏綿之
意輒因還使聊布謝忱

上錢閣學

夫子大人函丈前年冬初因汪君奉諭作復亮陳道監
去歲館蜀靡有甯時今春聞仍典春官再師胄監道躬
萬福望宿聲高坐閱浮沈斯爲大隱海冰將合沸議無

驚詠京華歲暮之詩想儒館益簪之慶自愧杜陵之卻
憶尤深馬帳之歸仁驤首朔風心其闢矣朝多新進事
有危疑清而不要之官天所以優賢哲闔運年行五十
名廁三千庶以清貧仰希沆灑然旅食猶裕邸費殊艱
敬奉微資與黃生合爲消寒之數非敢爲獻聊以將誠
蜀中英俊頗多商量較易惟將家不易未能久畱明冬
決還有早無遲也此來攜一子四女家中畱三子二女
自領一妾婦率兩婦在家游資不能寄歸家用竟無所
減爲一已計不如歸也吾師頗知有老宿冒遠方來教
者否不獨蜀中虛席湘上亦新立校經堂方謀名師闔

運方欲從學庶幾所亡餘容賡言

致穆師耶

芸閣仁兄先生道席成都聚會雅照殷拳臨別餞餽隆
議稠疊受非所望好永勿諉敬想興居惟祝綏福闔運
於初冬解纜臘首到家幸託星臨俱臻平善仲子葬地
未卜迫欲移鄉時屆殘年惟多喧擾不識明歲能少休
問否左相已去涂撫未來湘城尙無新政惟盜竊頗甚
天氣大煊今年尙未皮衣小有疾病弟已受思賢講席
之聘不成書院規模尙可藏拙郭筠老必欲移交故不
能辭也錦城風氣喧囂皆由當道諸公狃於故習督部

初政尙威近頗多假借似不相宜此在贊佐者之善爲將伯耳

與曠優貢

鳳岡仁兄大人閣下得惠書循誦歡喜今春還館聞遠試權局自恨薦賢之不用故不復通問猶以爲旦夕當還也遲遲又久乃聞所言不聽反移他去今日官廳議論又以前上稟牘爲鄂生所紅勒以爲喜笑其果有此舉以裁成大材如漢文之於賈生邪則鄂生非其人也傳之之誣邪則噲等不可爲伍也三篇六比文得官何足愛惜不如投劾歸去從吾所好養其浩然以待大用

蓋仁兄之質地近於古循吏若姑與委蛇必至兩無所成且事有弄假成真者卽不能有剛毅之實而爲剛毅之行亦足以增長魄力開拓心胸一遷再遷甚無謂也蜀中吏治委靡鮮有豎脊彊項之吏闔運所爲深發憤者也今督府之待闔運不能不爲羈畱此外羣賢俟督府去而將加白眼雖復巧言令色足恭脅肩終亦不能守此千四百金之富貴唯有一切不理高視闊步而已又可笑也與循遲遲得一第誤歸本班更不如捐班之資深夏觀察語大不對題麗生差強人意然其人爲家夔所賞蓋亦脂韋之士如張孝達非不卓卓而能在總

著優游皆不足爲直人此等正當如英吉利法以棒敲其紅頂豈可一日與游乎若有書致譚幸爲我告之今年不作東游相見計隔歲矣天寒伏惟珍重

致許師耶

仲笏仁兄先生道席錦城盛饒節府雅談餘韻旋聞歸舟已發想詩棋之暇豫有杜少之風流一忙一閒何能不羨左督馳赴新任蘇撫乞休梓里新章又當改換淮軍月餉懼必不支近日申報復以最不配服李中堂之衛靜瀾充補簡公一席關懷大計者何以策之闔運於臘初抵家非復前年歡會因思節樓賓客亦當追憶季

懷至於龍鐙音尊皆當密靜春盤生菜正賴阿杜少慰
寂寥耳天道貞元復當開熱他時良晤可爲滿引一觥
也手肅申謝卽頌道安

致王編脩

正孺仁兄侍者奉別十二年同城半載僅得五六相見
傾倒之懷未盡百一然友朋離別不過相望音儀耳若
學業撙飭切磋觀摩無煩晤對此後再十二年一見猶
爲數也老伯賜餞賜金當脩牋謹謝旣念公政總集披
覽爲勞又當煩長者作答謹因鯉對時爲啟下忱過節
交還宜縱談時事奈此處新聞書到時已成舊話又無

可采卽亦不贅所屬者老人告歸得請可先相報較邸鈔爲捷也閩運今年還家有悲無樂敝省經席已請陶子珍尙有一席係郭侍郎遺缺當王姓頂補者便以見屬家夔石先旣不辭閩運亦學左相謝恩拜命矣風便書來在省城爲易達餘俟續聞

湘還奉手書寄到連贈立軸伏承移居城中廣大清閒錫蠟之居牆壁錦繡澎侯馬廐今館賢人甚盛甚勝又於春杪見鈔登兩疏論尙書者典雅明通爲我朝僅見之作論公費者陳義甚高自許甚至然於正義尙少發揮究嫌喧賓奪主宜將辦法多敘二三十句雖敷衍不

妨也孝達登朝將盡摠所蘊以經營八表吾弟觀之助
之規之勸之贊之揚之當有相得莫逆者不可效王荆
公故人以宰相疏之也垂老之年復逢事變思之惄然
自傷然昔賴諸賢宣力於疆場今望羣公制勝於尊俎
英英衮衮皆吾友朋附驥尾而青雲馳椒北而止息則
非已所能自卜矣書籍只有此數舊藏大家今則童生
武官動知經子書目無須於問答徵求輒見之公文益
少益昂自然之理亦無雍乾之世布粟流通咸同以來
金銀滿地益富益貧分合多寡之數也閭閻初欲樞衣
於西東一撫略獻芻蕘以盡平生交誼乃爲西道所誑

因循至今忽聞婦病倉皇馳還兩月復返仍居舊館並無課讀閱卷之意亦無修金節禮之心主人朝移則賤生晨去天下事大類若此亦可傷悼至於日課月程尙有左相一息尙存之志亦不至全負所期耳暮氣頽唐頗悔收藏之陋字畫真贋雜糅贋者或亦亂真尙有廠店之游見有隆萬以前畫軸及時手著色卉鳥鮮活者價在十兩以下爲我陸續致數百十軸十兩以上雖寄贈必辭也此事當優而游之斷非公車所能辦翰林名實正在此耳夏日正長木天多暇惟爲道自愛不宣

致張臬臺

箋啟五

子衡先生仁兄司使臺下前年賀全福來具述起居並

言將購藏經書屬訪時價比附一詩上問餐憶詩曰不見瓶公

二十年近來新句萬人傳名花開落皆春色匹馬東西

作戰仙金印拋將滄海去玉琴間憶北窗眠似聞詩味

酸醎外那用以後鹽訟大興左師敗績全福遠颺郵筒

莫達竊計必有報章與三百新票俱空矣昨得手書並

見賜大集未得拙詩也全福荒唐乃至此乎然心心相

應具有感孚何待遠引果臣以證知已三月三日春陰

靄然午坐小樓讀畢一過賤名乃在味根錄中又莞然

東望想見爾時談燕如夢中也鼙鼓笙歌皆已岑寂唯

餘宿齒七八人何論富貴功名學問但得結屋鄰居雞

黍互過再二三十年足了此生而諸公尙各放光明乾
沒不已闔運亦隨俗浮沈不遂倡導之願公其有意歸
乎徵費四方除茅二澗真不患無鹽也長沙城居煩擾
買山未就方且將游三輔仍館成都一二歲間再當還
隱計彼時左彭衰矣托末契於後生何必老而爲客招
隱不如反招隱他日相見快論其懷十餘年不通書輒
先布意敬問侍安不具

致錦兵備

芝山先生仁兄節下到館恩宥尙未脩牋頃奉賜書欣
承安吉今年海關稅減商賈蕭條台端極力振除得資

源濟當道諸公均謂因難見巧秋冬必有大旺以副蓋懷也和局爲庚子以來未有之榮夷情已可槩見而內外諸公不探其理張皇卻顧正墮計中藩使痛哭於廷制軍聊以行國忠憤之氣鬱在坤維他日當有效見時乎芥帆始抵箭鑪其事易了前委二件通判已奉檄曾丞尙無報也女帨到卽大病昨始全愈舍弟仰荷扎委俟告之大府悉依指揮耳小坡暫支荒月遺缺當卽馳來既有家蓮之例私話可作官話定可過冬矣穉雲昨始到省子實亦已固位沈朗山燒去官囊未了官事詒山獨爲笏擊奪其千金以與周崔次民祥人皆有起色

伯楷聞有出使之選未知誰所舉也張月公以起解鄂生風行雷厲此間頗怪之交情頓盡惟闔運未隨眾罵之公事難於認真台端久經閱歷當爲一歎廣督爲晉撫所得今年局面似無更移秋後卽當迎致妾女安排過年殊非意計所及恃有東道屢煩免單無亦稅絀之一端耶驟暑新涼手書叩安並頌邸福不具

芝生仁兄先生兵備節下三年厚眷非謝所宜兩次傳贐私衷悚仄旣不能效曾文正十分取一又不能學左季高長跪受金斟酌勞神反抱怨仁恩之非知己耳投桃報李今年別有反璧之時也月公蒞任交替得人暇

豫春游定多福喜甚頌甚幸閩運於臘月初三到省左
相已於先日由陸登舟一見無緣殊未償廿年離債唯
聞其據鞍矍鑠猛氣凌厲尙無異往時曾伯亦暫還湘
鄉彭公尙畱衡陽明春始有勝會耳龐藩新政公敏湘
吏欣然涂公不日到官必多黜陟閩運到日卽受思賢
講席之聘館穀千金固不待言所懼者生徒不及蜀中
精神或爲浪費果就與否尙待參詳亡子先歸其母愼
於葬地至今不能入土閩運亦不便促之餘有三兒七
女幸俱頑健唯詵詵蟄蟄蝸居所不能容則當移一大
宅尤勞求問弟向不理家今失次兒諸事皆須自營以

拙妻悲感悉謝世緣家事無人可託也念此仍有遠游
之志大家撒手仁兄能無哂而憐之否船還事冗手肅
奉謝

致陳進士

笠唐仁兄大人台席前得手書猥承謙謝布帆偶落兼
荷勤詢具仰高情無任慙荷船山解館遂反山莊心緒
未康致未入府前歲承香帥念舊歲損離餘比卽作書
謹辭適逢交替峴公飭送如約嫌於厚張輕劉故未敢
卻之卻之自蹈不恭之愆今已逾三年拜賜多矣國事
可憂何暇及私尙希代致歉忱蠲此問款闔運非矯廉

之士諸公有過惠之情原留鈔呈庶知本志若實甫核
減之說方將據案而爭豈有營情豆箚而敢輕鍾祿請
傾今年而辭來歲隋爵之局或病或彈當復闌珊亦可
歎也省城歲盡公私寥落江南除夕冠蓋如雲仁兄何
去何從幸以報我明正晴煖或當入城訪朱宇田詢其
虧空便可仍陪雅宴也專此奉達敬叩歲安

湘綺樓箋啟卷第五終